

TOPA TE YOÂM TU' MÛG YEYOX KUNNIX XIX HÂPXOP XOHIX

1 ¹Yeyox Kunnix te yûmû'â' mûg hâpxop punethok, tu yâ y mûn mûg, ha 'âte nôm kax'âmi tappet tu'. Topa te' xat, pu' mûg yâ y yôg tikmû'ûn tu', yâ yâ y yôg kâmanat xop tu'. Hâpxip kutôgnâg 'ihâ tikmû'ûn te nôm hâpxop xohix pênâp-tup, ha Yeyox Kunnix te yûmû'â nôm hâpxop xohix mûg. Kunnix te nû'kutnâhâ pexkox yôg nû'pok xop, puyîy Yoâm tu nôm mûg. ²Yoâm te' pênâhâ, tu hâpxop xohix kax'âmi!, yâ' kax'âmi nû tappet tu'. Topa te' popmâhâ!, ha Yeyox Kunnix te tu' mûg, ³ha tikmû'ûn te nû tappet mökupix, puxix tu' kuxa hittup. Tikmû'ûn te nû tappet 'âpak, tu' yîpkox pip, puxix tu' kuxa hittup. Nû tappet tu' kax'âmi hâpxopmâ'ax, ha hâpxip kutôgnâg 'ihâ tikmû'ûn te nôm pênâp-tup.

Yeyox kopa kuxa mãm xop xohix te' 7

⁴Ûgmûn Yoâm, tu nû tappet kax'âmi Yeyox kopa kuxa mãm xop xohix te' 7 pu' hâpxexka 'Ax tu'. 'Âtep-tup, pu Topa 'âxop ha hâmmaxnâ', nûy 'âkuxa mãmâ'. Hônâhâ' xip Topah, tu ta' xip hõmâ, tu ta' nûn putup.

Ha ta' pip 'ûkoxuk xohix te' 7 Topa keppah xix yôg mîmpe yûm'ax xe'êgnâg keppah. 'Âtep-tup, pu Topa 'âxop pu hâmmaxnâ', nûy 'âkuxa mãmâ kamah. ⁵'Âtep-tup kamah, pu Yeyox Kunnix 'âxop ha hâmmaxnâ', nûy 'âkuxa mãmâ'. Yeyox te yûmû'a hâpxe'e xohix 'âktux. Yâ Topak-tok te mâxap xip tu' xok tâmnâg, tu putpu' hi!, tu hãm xexka yôg xat'ax xop xat. Tute yâ y yûmûg xe'êgnâg, tu' xok, hu yûmûg kuxa kummuk xit, tu kuxa max mô'tat, 'ûyânân tu!, ⁶tu yûmûg mîy 'âmânex xop, yâ Topa yôg xop. Tute yûmûg xat, ha yûmû'âte Topa pu hâpxopmâ max, yâ yûmûg 'âtak Topa pu hâpxopmâ max. Yeyox Kunnix yâ' max xe'êgnâg, tu' max xe'êgnâg mökuma'môg, ha' kux 'ohnâg. Hamûn.

⁷Pênâ', 'ûnûn putup hãmgõy xexka kopah! Tikmû'ûn xohix xexka te' pênâp-tup. Hõmâ ha ta tikmû'ûn te pox xexka hâ' xuhmîy. Yâ tikmû'ûn te nôm pênâp-tup, hu potap-tup. Hamûn. Hã kaxîy.

⁸Topa xexka 'ûka'ok, tu hãm'âktux, hu: "Ûgmûn yâ mâxap xix ka'ax. Hõmâ' xip'ah hãm xexka xix yôg hâpxop xohix, 'ihâg xip. Ha ta' nõg

putup hãm xexka xix yõg hãpxop xohix, 'ihãg xip putup. Hõnhãg xip, tu tak xip hõmã, tu tak nũn putup.” Kaxĩy.

Yoãm te Kunnix pẽnãhã'

⁹Ha tak mũn yã 'ãtaknõy Yoãm. 'Áte' xũy hã tot, yã 'ãxop putuk. 'Ûkxip Topa te nõm xat xop kopah 'ãxop mũtik, tu Yeyox tuk xip ka'ok 'ãxop putuk. Hõmã 'ãte tikmũ'ũn pu Topa 'ãktux xix Yeyox 'ãktux, ha tikmũ'ũn tek mũg, tuk xix nũnte hãm tot tu', ha kõnãg te' yĩmap, yã hãm tot 'ũxuxet'ax Pat.

¹⁰Yenomĩy 'ihã Topa Koxuk tek mõgãhã', pa 'ãte yãnmũn xupep'ax ka'ok 'ãpak 'ũkxãm tu', yã mĩxux xop tut kaxyã'ax putuk, ¹¹tu hãm'ãktux, hu:

—'Ápu 'ũpẽnã xop kax'ãmi', tu tappet hõm Yeyox kopa kuxa mãm xop te' 7 pu', yã kõmẽn 'Ep tu', xix kõmẽn 'Exmĩy tu', xix kõmẽn Pek tu', xix kõmẽn Tittit tu', xix kõmẽn Xahat tu', xix kõmẽn Pinanep tu', xix kõmẽn Namnixet tu'.” Kaxĩy.

¹²Ha 'ũgyõkãnãm, nũy 'ũkxãmpa' pẽnã', nũy nõm te hãm'ãktux pẽnã'. Pa' pip kuyãnãm tat'ax xohix te' 7. Yã yãnãm 'ãta yĩxux hã' mĩy kũyãnãm tat'ax. ¹³Pa' xip nõm te Tikmũ'ũn Kutok putuk kuyãnãm tat'ax kote!. 'Ûyõg topixxax tox, tu' pata tu' kux, tu' tat 'ũkotex hĩy'ax, yã yãnãm 'ãta yĩxux hã' mĩy, ¹⁴tu' xep-nok, yã kahnẽn xep-nok putuk, pe tex xap ponnok putuk, tu' pa te kuxap xexka putuk, ¹⁵tu' pata te kuyãnãm mõ'yõn, yã pipkup monõn pukpex xexka putuk, tu' xutnuk. Tute hãm'ãktux ka'ok, yã xamoka xexka putuk. ¹⁶Tu' yĩpxe'e hã' tat mãyõnnãg xohix te' 7, tu' yĩkox tu' xupep mĩkax xexka', yã xox mut tix, tu' pa te kuyãnãm xexka mõ'yõn, yã mãyõn putuk mẽynix 'ihã'.

¹⁷Ha 'ãte' pẽnãhã', tuk nãhã 'ũpata yĩkak, tuk xok putuk. Pa tik nũn, tu nũktuk yĩmũ' yĩm xix, tu:

—'Ákuxa nõg hok. 'Ûgmũn yã mãxap xi' ka'ax. Yã hõmã' xip'ah hãm xexka xix yõg hãpxop xohix 'ihãg xip. Ha ta' nõg putup hãm xexka xix yõg hãpxop xohix, 'ihãg xip putup. ¹⁸'Ûkxip. Hõmã 'ũkxok, pa pẽnã' 'ũkhi putpu', tuk xip putup mõkumakmõg hãm yãxatamuk xohix kux 'ohnãg hã. 'Ûgka'ok.

'Áte' xat, puxi' xakix 'ũxohix. 'Áte' xat hok, puxi' xakix hok. 'Áte xakix xop xat kamah. ¹⁹'Ápu hãmpẽnã'ax kax'ãmi yã hõnhã yõg hãpxopmã'ax kax'ãmi xix hãptup yõg hãpxopmã'ax kax'ãmi kamah. ²⁰'Áte xa' yũmmũgãhã hãpxop xaptop, yã tikmũ'ũn te nõm yũmmũg 'ohnãg. 'Ûpip mãyõnnãg xohix te' 7 'ũgyĩpxe'e kopah, ha' pip kũyãnãm tat'ax te' 7. Mãyõnnãg te' 7 yã pexkox yõg nũ'pok'ax te' 7, yã nõm te Yeyox kopa kuxa mãm xop te' 7 pẽnãhã'. Ha ta kuyãnãm tat'ax yã kõmẽn te' 7 yõg Yeyox kopa kuxa mãm xop te' 7. Kaxĩy.

Kõmẽn 'Ep yõg kuxa mãm xop pu hãm'ãktux

2 ¹Tu xe:

—'Ápu kax'ãmi pexkox yõg nũ'kutnã'ax pu nõm te kõmẽn 'Ep yõg Yeyox kopa kuxa mãm xop pẽnãhã'. 'Ápu kax'ãmi', hu:

“'Áte xa hãm'ãktux. 'Áte mãyõnnãg te' 7 tat 'ũgyĩpxe'e hã, tu hãpkumep kuyãnãm tat'ax yãnãm 'ãta yĩxux kote!. ²'Áte 'ãxop yõg hãpxopmã'ax yũmmũg.

'Áte' yūmmūg 'āxop te hāpxopmā max punethok, tu Yeyox tu 'āxop pip ka'ok. 'Áte' yūmmūg 'āxop te' tot 'ohnāg tik kummuk. Tik kummuk te: "Ūgmūg pip Yeyox yōg mō'pok xop kopah." Kaxīy. Pa 'āxop te yōg hāpxopmā'ax kopit, tu' koit yūmmūg. ³'Āxop te hāmmax hip. 'Āxop yā yōgnū xop, hu 'āxop xūy, pa 'āxop te hāpxopmā max kux 'ohnāg. ⁴'Āxop te hāmmax mīy, pa 'āxop te hāpkummuk mīy kamah. Yā hōmā 'āxop tek putup pax max, pa hōnhā 'āmhok. ⁵'Āpu hāmp'eāpaxeh. Hōmā 'āxop te hāmmax mīy, pa hōnhā 'a kaxīy'ah. 'Āpu hāpkummuk mīy kux, nūy putpu mōg, nūy xe' mīy 'āxop te nōm mīy hāmāxap. Pa 'āxop te hāpkummuk kux 'ohnāg, kopxix 'āxop hak mōg, nūy xut 'ōg kuyānām tat'ax. ⁶Pa 'āxop max, yā 'āxop tep-tup nōg Nīkonax xop yōg hāpxopmā'ax. 'Ātep-tup nōg kamah. ⁷'Āyīpkox pip, nūy ta xupax Topa Koxuk te nōm 'āktux Yeyox kopa' kuxa mām xop pu!" Kaxīy.

Kōmēn 'Exmīy yōg kuxa mām xop pu hām'āktux

⁸Tu xe:

—'Āpu kax'āmi pexkox yōg nū'kutnā'ax pu nōm te kōmēn 'Exmīy yōg Yeyox kopa' kuxa mām xop pēnāhā'. 'Āpu kax'āmi, hu:

"'Áte xa hām'āktux. 'Ūgmūn yā māxap xi' ka'ax. Yā hōmā' xip'ah hām xexka xix yōg hāpxop xohix, 'ihāg xip. Ha ta' nōg putup hām xexka xix yōg hāpxop xohix, 'ihāg xip putup, tuk xok tāmnāg pa putpuk hi'. ⁹'Áte' yūmmūg 'āxop xūy. 'Áte' yūmmūg 'āxop putexop 'ohnāg, pa 'āmhok, 'āxop putexop xexka! 'Áte' yūmmūg tikmū'ūn te 'āxop 'āktux kummuk, tu hām'āktux hu: "Ūgmūg yā Yoneo xop kopak pip." Kaxīy. Pa 'āmhok, yā' koit, yā Hāmgāyāgnāg yōg xop kopa' pip. ¹⁰Hāpxip 'ihā 'āxop xūy'ax, pa 'āpu 'ākuxanōg hok. 'Ūxupax. Hāmgāyāgnāg te 'ōg hāpxopmā'ax kopit putup, yā' xat putup, pu tikmū'ūn 'āxop xeh kanet ka'ok kopah, ha 'āxūy'ax 'āmnīy te' ¹⁰hā. 'Āpu 'ātu pip ka'ok, hu mōg hu yā 'āxakix, ha 'āte xa popmāp-tup 'āhi'ax kux 'ohnāg yōg xexka xop yōg kuxxax.

¹¹'Āyīpkox pip, nūy ta xupax Topa Koxuk te nōm 'āktux Yeyox kopa' kuxa mām xop pu!

Tikmū'ūn te xakixp-tup, tuk-nāy tu' mōg putup Hāmgāyāgnāg pet tu', tu' xūy, pa' xut xop mōg putup'ah." Kaxīy.

Kōmēn Pek yōg kuxa mām xop pu hām'āktux

¹²Tu xe:

—'Āpu kax'āmi pexkox yōg nū'kutnā'ax pu nōm te kōmēn Pek yōg Yeyox kopa' kuxa mām xop pēnāhā'. 'Āpu kax'āmi, hu:

"'Áte xa hām'āktux. Yōgnū mīkax xexka xox mut tix xip. ¹³'Áte' yūmmūg 'āpip'ax. Yā Hāmgāyāgnāg yōg xexka xop yōg mīmpe yūm'ax xip 'ōg kōmēn kopah, yā Hāmgāyāgnāg yā' xexka', tu' xat kōmēn yōg xop. 'Āxop 'ātu 'āpip ka'ok, hu yōgnū putat max xak 'ohnāg. Hōmā' xip 'Ātip, yā yōgnū kāmānat, tu 'ā tu' xip ka'ok, ha tikmū'ūn tep-tex nōnte Hāmgāyāgnāg yōg xip'ax tu', pa 'āxop te yōgnū putat max xak 'ohnāg. ¹⁴Pa 'āxop te hāpkummuk mīy, yā yāg pip nōnte, tu Manak yōg hāmyūmmūg tat. Yā hōmā Manak te 'Iyaet xop

mōgāhā', pu hāpkummuk mīy, yā xit'ax mähā tikmū'ün te topa komut xop pu nōm popmāhā'. Tute tikmū'ün pu' yūmmūgāhā', pu' nōy hā xupxet kamah. ¹⁵Ūpip kama 'üyāg xop, tu Nīkonax xop yōg hāmyūmmūg tat. ¹⁶Āpu 'ōg hāpkummuk mīy kux. 'Ūkux 'ohnāg, koxkik mōg, nūy yāy kix nōm tikmū'ün mūtik. Yā 'āte yāy kix putup mīkax xexka hā nōm xip 'ūgyīkox kopah.

¹⁷Āyīpkox pip, nūy ta xupax Topa Koxuk te nōm 'āktux Yeyox kopa' kuxa mām xop pu'!

'Āte pām mánā popmāp-tup 'ūxut xop pu'. 'Āte nōm pu' popmāp-tup kama mīkaxxap ponnok, tu nōm yīmū' kax'amip-tup 'ūxuxat'ax tup, ha nōm te' pop te 'āxet'ax yūmmūg putup, pa' nōy te' yūmmūg putup 'ohnāg." Kaxīy.

Kōmēn Tittit yōg kuxa mām xop pu hām'āktux

Tu xe:

¹⁸—Āpu kax'āmi pexkox yōg nū'kutnā'ax pu nōm te kōmēn Tittut yōg Yeyox kopa' kuxa mām xop pēnāhā'. Āpu kax'āmi, hu:

"Āte xa hām'āktux. 'Ūgmūn yā Topak-tok, tuk pa te kuxap xexka putuk, tuk pata te kuyānām mō'yōn, tu pipkup monōn pukpex xexka putuk, tu' xutnuik. ¹⁹Āte 'ōg hāpxopmā'ax yūmmūg. 'Āte' yūmmūg 'āxop te' nōy putup pax, tu 'āxop te 'ātu 'āpip ka'ok, tu 'ā hāpxopmā max punethok, tu 'āxop te hāmmax hip punethok. Hōmā 'āxop te hāpxopmā kōnāmāhā', pa hōnhā 'āxop te hāpxopmā max punethok. ²⁰Pa 'āxop te hāpkummuk mīy. Yā' xip nōnte 'ūhūn 'ūxuxet'ax Yeyamet, tu hāpkummuk mīy, pa 'āxop te nōm hupmā 'ohnāg. Tute hām'āktux, hu: 'Topa te nūgkutnāhā'. Kaxīy. Tu tikmū'ün pu hāmyūmmūgāhā', tu' koit, nūy yōgnū kāmānat xop mōgā', puyī' nōy hā' xupxet, puyī' xit tikmū'ün te topa komut xop pu nōm popmā'. ²¹'Āte' hip, tu 'ün kummuk pu' popmāhā 'āmniy xohix, puyīy hāpkummuk mīy kux, pa 'ap-tup'ah, yā' kux 'ohnāg. ²²Yīy 'āte 'ün xat putup, puyīy mīmpe mō'yōn'ax tu' xihip ka'ok, tu' xūy xexka putup. Ha ta tik te nūmūtik xonnix, yā Yeyamet putuk, tu' xūy xexka putup kamah. Yā hāpxip kutōgnāg 'īhā 'āte nōm mīy putup. Pa tik te hāpkummuk mīy kux, kopxi' mīy 'ohnāg. ²³Āte Yeyamet kutok kix putup, ha mōktu' kuxa mām xohix xop te' yūmmūg putup, 'āte tikmū'ün kuxa pēnāhā', xip-tox kopa pēnāhā', tu hāpkummuk mīy'ax hā yānān.

²⁴Pa 'āxop nōy te kōmēn Tittit tu' pip, tu nōm hāmyūmmūg kummuk tat 'ohnāg. Yā hāmyūmmūg 'ūxuxet'ax, hu: 'Hāmgāyāgnāg yōg hāmyūmmūg xaptop.' Kaxīy. Pa tikmū'ün te xa nōm yūmmūgā 'ohnāg, yīy 'āxop te nōm yūmmūg 'ohnāg. Nōmhā 'āte xa hām'āktux, 'ap 'āte 'āxop xat putup'ah 'ūxeheh, xayīy hāpxop nōy mīy. Puxix. ²⁵Ūpip 'āxop yōg hāpxopmā'ax. Āpu 'ūxe' mīy, ha mōktuk nūn putpu'. ²⁶⁻²⁸'Āte' xat putup, puyīy xut xop hām xexka yōg xohix xop xat. Yā nōm te' mīy 'āte nōm putup ha mōktu hāmyāxatamuk xohix xox putox, ha 'āte' xat putup, puyīy nōm hām xexka yōg xohix xop xat. Yā nōm xat putup, 'īhā 'āte nōm xat kamah. Yōgnū 'ātak te' xat, 'ūyīy hām xexka yōg xohix xop xat. Yā Topa tek xexka mīy, hā kaxīy 'āte nōm xop xexka mīy putup, puyīy hām

xexka xohix xop xat. Yä' xat ka'ok putup. Tik te nax koxyöy pipkup xexka tox hä. Hä kaxiy 'üxat ka'ok putup. 'Äte nöm xat xop pu' höm putup mäyönnäg xexka'.

²⁹'Äyïpkox pip, nüy ta xupax Topa Koxuk te nöm 'äktux Yeyox kopa' kuxa mäm xop pu!' kaxiy.

Kömën Xahat yög kuxa mäm xop pu häm'äktux

3 ¹Tu xe:

—'Äpu kax'ämi pexkox yög nü'kutnä'ax pu', nöm te kömën Xahat yög Yeyox kopa' kuxa mäm xop pënähä'. 'Äpu kax'ämi, hu:

“Äte xa häm'äktux. 'Äte yäy yim hä' tat 'ükoxuk xohix te' 7 Topa yög xix mäyönnäg te' 7. 'Äte 'äxop yög häpxopmä'ax yümmüg. Tikmü'ün te hämp'e'paxex 'äxop hi', pa 'ämhok, 'äxop te' xakix xop putuk. ²'Äpu yäy koxah. 'Äpu yäy ka'ogä', nüy häpxopmä'ax ka'ogä', nüy häpxopmä max hupmä hok. 'Äte' yümmüg 'äxop yög häpxopmä'ax 'ap xe'e'ah Topa keppah, yä Topa pu' kummuk. ³Hömä 'ünöy te xa häpxop max yümmügähä', ha 'äxop te' xupak. 'Äpu nöm pe'äpaxeh, nüy mïy, nüy 'äxop yög häpkummuk mïy'ax nōä'. Pa 'äxop yäy koxak 'ohnäg, kopxix 'ügnün putpu' xupxet nün putuk, yä tikmü'ün te xupxet hip 'ohnäg. Texiy 'ügnün? Häm'ümhäg nün? 'Äxop te' yümmüg putup 'ohnäg. ⁴Pa' yäg tih Xahat tu', tu yög topixax tup, yä xutputux 'ohnäg. 'Äxop te häpkumep putup 'ügmütik, tu topixax ponnok tat putup. Yä' max te kaxiy. ⁵'üxut xop te topixax ponnok tat putup, ha 'a 'äte' möy putup'ah 'üyög xuxet'ax tappet tu', Topa te nöm kax'ämi', yä Topa te nöm tu' kax'ämi', tikmü'ün 'äxet'ax nöm hi xe'ëgnäg mökuma'mög, ha' kux 'ohnäg. 'Äte häm'äktux putup, hu: 'Yögnü tikmü'ün nō'öm.' Kaxiy. Yä Topa keppa 'äte nöm 'äktux putup xix pexkox yög nü'pok xop keppah.

⁶'Äyïpkox pip, nüy ta xupax Topa Koxuk te nöm 'äktux Yeyox kopa' kuxa mäm xop pu!' Kaxiy.

Kömën Pinanep yög kuxa mäm xop pu häm'äktux

⁷Tu xe:

—'Äpu kax'ämi pexkox yög nü'kutnä'ax pu', nöm te kömën Pinanep yög Yeyox kopa' kuxa mäm xop pënähä'. 'Äpu kax'ämi hu:

“Äte xa häm'äktux. 'Ügmax xe'ëgnäg, tu 'äte häpxe'e mïy, tuk yim hä tat Namix yög pipkup hämyinnin'ax. Tute häpxön, ha ta tikmü'ün te möhämyinnin yümmüg 'ohnäg. Tu tu möhämyinnin, ha ta tikmü'ün te häpxön yümmüg 'ohnäg. ⁸'Äte 'äxop yög häpxopmä'ax yümmüg. 'Äte' yümmüg 'äxop ka'ok kutögnäg. 'Äte 'äxop pu hämyümmügähä', ha 'äxop te' mïy, tu 'ätu 'äpip ka'ok. 'Äte xa häpxön, ha ta tikmü'ün te möhämyinnin yümmüg 'ohnäg. ⁹'Üxupax. 'Üpip Hämgyägnäg nönteh, tu häm'äktux, hu: 'Ügmüg pip Yoneo xop kopah.' Kaxiy. Pa yä' koit. 'Äte' xat putup, ha nöm nün putup, tu nüktu häm tu' pip putup 'äxop keppah, tu' yümmüg putup, 'äte mö 'äxop yäy xe'ëgnäg. ¹⁰'Äxop te yögnü xat'ax mïy. 'Äte xa' xat, hu: 'Äpu häpxop max hip. 'Äpu putat max xak hok.' Kaxiy. Ha 'äxop te' mïy. Yiy 'äte 'äxop pënä maxp-tup, ha ta' nün putup

hāpxop xohix kummuk, puyīy hām xexka yōg tikmū'ūn xohix yōg hāpxopmā'ax kopit. ¹¹Hāpxip kutōgnāg 'ihāg mōg putup 'āxop hah. 'Ūpip 'ōg hāpxopmā'ax max. 'Āpu nōm pēnā ka'ok, nūy mīy kux hok, yīy ta' nōy te 'ap xupxet putup'ah. 'Ūxut xop yōg kuxxax yā 'ōgnū'. ¹²'Āte' xut xop hā' mīy māykup putuk yāy pet yōg. 'Āte 'āxop ka'ogāp-tup, ha xate xek pet nīm putup'ah. 'Āte xut xop yīmū' kax'āmip-tup Topa 'āxet'ax xix Topa yōg kōmēn yōg 'āxet'ax kax'āmip-tup kamah, yā' xuxet'ax kōmēn Yenoyanēn Tup. Kaxīy. Yenoyanēn Tup te pexkox tu' yīxop-tup. 'Āte xut xop yīmū' kax'āmi putup 'ūyōg xuxet'ax tup kamah.

¹³'Āyīpkox pip, nūy ta xupax Topa Koxuk te nōm 'āktux Yeyox kopa' kuxa mām xop pu!'” Kaxīy.

Kōmēn Namnixet yōg kuxa mām xop pu hām'āktux

¹⁴Tu xe:

—'Āpu kax'āmi pexkox yōg nū'kutnā'ax pu nōm te kōmēn Namnixet yōg Yeyox kopa kuxa mām xop pēnāhā'. 'Āpu kax'āmi, hu:

“'Āte xa hām'āktux. 'Āte Topa tuk xip ka'ok, tu Topa yōg xat'ax mīy pax, yāg hup 'ohnāg, tu tikmū'ūn pu Topa yōg hām'āktux xe'e 'āktux. Hōmā 'āte' mīy Topa mūtik hāpxop xohix. ¹⁵'Āte 'ōg hāpxopmā'ax yūmmūg. 'Āxop pukpex 'ohnāg xix xuxix 'ohnāg, yā 'āxop tek putup pax xexka 'ohnāg xix putuppax kutōgnāg 'ohnāg. 'Ātep-tup pe pukpex pe xuxix, ¹⁶pa 'āxop pukpex mīax, yīy 'āte 'āxop yāy yīkox kopa mō'yōn. ¹⁷'Āxop te: “Ūgmūg pute xop xexka', tu hāpxop xohix xexka pip 'ūgmū yōg. 'Ak mū'āte hāpxop nōy putup'ah. Puxix.’ Kaxīy. Pa 'āxop te hāmyūmmūg 'ohnāg 'āxop yāy'igā', xix 'āhittup 'ohnāg, xix 'āp-te xop 'ohnāg, xix 'āpa hok, xix 'āxax top. ¹⁸Hōmā 'āte xa hām'āktux, hu: Mā, ha 'āte 'āxop mīy putup 'ūp-te xop xexka 'ākuxa kopah. Mā, nūy pop topixxax ponnok, nūy 'āxax top kummuk pak. Mā, nūy pop hehmēn 'āpa pu', nūy hāmpēnā', nūy hāmyūmmūg. ¹⁹'Āte mō tikmū'un yāy xe'ēgnāg, ha nōm te hāpkummuk mīy, ha 'āte: Kaxīy hok, yā' max'ah. Kaxīy. Tu nōm xūyghāhā'. Yā 'āte mō nōm yāy xe'ēgnāg. 'Āpu hāmpē'āpneh, nūy hāpkummuk mīy kux. ²⁰'Ūxupax. 'Ūkxip hāmyīnnīn'ax yīkah, tu hām'āktux, hu: Hāpxon! Kaxīy. Tikmū'ūn 'ūm 'ūkopa' xip, tu' xupak, tu hāpxōn, koxix mōnāy 'ūpet hā, tuk xit putup nūmūtik, ha' xit putup 'ūgmūtik.

²¹'Āte' xut xop xat putup puyīy māhām 'ūgmūtik 'ūxexka xop yōg mīmpe yūm'ax yīmū', ha 'āte' xohix xat putup, yā nōm te' xat putup kamah, yāk mūn putuk putup. Hōmā 'āte' xut, tu hōnhāg yūm yōgnū 'ātak mūtik 'ūyōg mīmpe yūm'ax yīmū 'ūxexka xop yōg.

²²'Āyīpkox pip, nūy ta xupax Topa Koxuk te nōm 'āktux Yeyox kopa' kuxa mām xop pu!'” Kaxīy.

Topa 'āktux max pexkox tu'

4 ¹Hāpxip 'ihā 'āte' pēnāhā pexkox tu', ha hāmyīnnīn'ax xōn, ha nōm yīy 'ūxeheh nōm te 'ā hām'āktux hōmā, yā' yīy te mīxux xop tut kaxyā'ax putuk, tu hām'āktux, hu:

—Mā nūnte pexkox tu', ha 'āte xa mūg hāpxopmā'ax pip'ax hāpxip kutōgnāg 'ihā, yā tikmū'ūn te nōm pēnāp-tup! Kaxīy.

²Hāpxip 'ohnāg 'ihā Topa Koxuk tek mōgāhā', hak mōg, pa' xip nōm te' xat yōg mīmpe yūm'ax xe'ēgnāg, ha 'ōm te' yīmū' yūm, ³tu' pa te mō kuyānām yōn, yā mīkaxxap takat putuk, yā mīkaxxap yax putuk, xix mīkaxxap xanōn putuk, ha ta' xip texxux, tu nōm te' xat yōg mīmpe yūm'ax xakot, yā texxux yīxux, tu mīkaxxap 'exmēnat putuk. ⁴Ha ta' pip kama 'ūxexka xop yōg mīmpe mām'ax xohix te' 24, tu nōm te' xat xakot, ha mīmpe mām'ax te' 24 yīmū' mām tik xexka te' 24, tu topixxax ponnok tat, tu' xexka xop yōg kuxxax yānām 'āta yīxux mō'tat, ⁵ha nōm te' xat yōg mīmpe yūm'ax te kote' xip, ha ta nōnte tu' xupēp yānām kō'āynām, xix hāmnāhūn, xix tex tinnāhā'. Ha ta' pip nōm te' xat yōg mīmpe yūm'ax keppa kuyānām tat'ax xohix te' 7, tu yōg kuyānām pip, yā' koxuk te' 7 Topa yōg. ⁶Ha ta' xip nōm te' xat yōg mīmpe yūm'ax keppa kōnāg xexka', yā gahap putuk, yā mīkaxxap ponnok max putuk.

Ha ta 'ōm pip, tu nōm te' xat yōg mīmpe yūm'ax xakot, yā yōnnā'ī te' 4, tu' pa pip 'ūkeppa xi' xāmpah. ⁷Yā yōnnā'ī te' 4 ha yāp-xet te xoktut putuk, ha ta' nōy te mūnūytut kutok putuk, ha ta' nōy pa te tik pa putuk, ha ta' nōy te mōmōka putuk, tu topahah. ⁸Ūxohix te' 4 yōg yīmāg pip. Yāp-xet yōg yīmāg xohix te' 6, ha' nōy yōg te' 6, ha' nōy yōg te' 6. Yōnnā'ī xohix pa xohix pip 'ūyīmap xi' kopah. Yōnnā'ī tek-te'ex hāptup tox hā xix 'āmnīy tox hā, tu' hup 'ohnāg, tu:

—Topah, 'āmax xe'ēgnāg, 'āmax xe'ēgnāg, 'āmax xe'ēgnāg. 'Āka'ok xexkanām, nūy hāpxop xohix xexka mīy yūmmūg. Hōmā 'āxip xix hōnhā 'āxip, tu 'ānūn putup. Kaxīy.

⁹Hā kaxīy yōnnā'ī tek-te'ex nōm te' xat pu, yā nōm te mīmpe yūm'ax yīmū' yūm, yā nōm ti mōkuma'mōg hāmyāxatamuk xohix kux 'ohnāg hā, ¹⁰'ihā tik xexka te' 24 te hām tu' xakux nōm keppah, tu' nōm 'āktux max, nūy nōm xexka mīy yāy kuxa kopah, tu yāy yōg xexka xop yōg kuxxax xex hām tu' nōm keppah, yā nōm te' xat keppah, tu:

¹¹—'Āmūn yūmūg xuxyā', yā yūmū yōg Topah. 'Āmax, ha' xohix te' yūmmūg 'āmax xe'ēgnāg, xix 'āxexkanām, xix 'āka'ok xexkanām. Hamūn, xate' xohix xexka mīy. Xatep-tup, yīy ta' pip 'ūxohix, tu' hi'. Kaxīy.

Tappet tox xix Kahnēn Kutok

5 ¹Ha ta' pēnāhā 'āte, pa' xip tappet tox kīy xahix 'ūyīpxe'e kopah, yā nōm te' xat 'ūyīm kopah, yā nōm te mīmpe yūm'ax yīmū' yūm, ha tappet tox kīy xahix yīmū' pip kax'āmi'ax punethok 'ūkeppa xi' xāmpah, ha kīy'ax xohix te' 7 te tappet tox kīy. ²Ha ta' xip pexkox yōg nū'kutnā'ax ka'ok, yā Topa yōg kāmānat, ha hām'āktux ka'ok, hu:

—Pi'ā' xip nōm max, yā nōm te kīy'ax mēp yūmmūg, nūy tappet tox ko'ah? Kaxīy.

³Pa' xip'ah pexkox tu' xix hãm xexka tu' nôm max, yã nôm te tappet tox ko'ah, nüy kopa' pẽnã'. ⁴Ûkpotaha', yã' xip'ah nôm max, yã nôm te tappet tox ko'ah, nüy kopa' pẽnã'. ⁵Ha ta' xip tik xexka', tu hãm'ãktux, hu:

—Ãpota hok. Pẽnã', 'Ûxip nôm ka'ok, tu xoktut putuk, yã xuxet'ax Yona xop yög xoktut, yã Namix yög xupepmã xop kopa' xip, yã tute' xut. Tute kiy'ax mep yümmüg, nüy tappet tox ko'ah. Kaxiy.

⁶'Äte' pẽnãhã', pa' xip nôm xuxet'ax Kahnën Kutok. Kaxiy. 'Ûk-nĩhã' xip nôm te' xat yög mĩmpe yũm'ax yĩmũ', ha yõnnã'ĩ te' 4 te Kahnën Kutok xakot, ha tik xexka te' 24 te Kahnën Kutok xakot kamah, ha Kahnën Kutok xok tap, payã' putpu' hi', tup-tox kup xohix te' 7, tu' pa xohix te' 7. 'Ûp-tox kup xi' pa yã koxuk te' 7 Topa yög, yã koxuk mö'pok hãpxexka xohix tu'. ⁷Ha ta' mög Kahnën Kutok, ha' xip tappet tox 'ünöy yĩm kopah, yã nôm te' xat yĩm kopah, yã nôm yũm mĩmpe yũm'ax yĩmũ', ha Kahnën Kutok te tappet paha', ⁸yã' paha', ha yõnnã'ĩ te' 4 te hãm tu' pip Kahnën Kutok keppah xix tik xexka te' 24 te hãm tu' pip kamah Kahnën Kutok keppah. Ha yõnnã'ĩ yög 'ap pip, nüy yög tutxit kaxyã', xix tik xexka xop te' kamah, tu' xohix yög kãnëy yãnãm 'ãta yĩxux pip kamah, nüy nôm kopa mö'hap 'ükõnnõn, nüy tu hax max 'ãpëp pepix. Hã kaxiy 'ükuxa mãm ka'ok xop te Topa pu hãm'ãktux, ha hãm'ãktux te pepi' mög. ⁹'Ûxohix tek-tex tup hãk-tex, hu:

—'Ämax 'ãpu tappet tox pa',
nüy kiy'ax mep.

Hamün, hõmã tikmũ'ün te 'ãp-tex,
yã tikmũ'ün pupi 'ãxok,
nüy tikmũ'ün mögã Topa hah.

Yã' xohix mögãhã',
yã hep xohix xop yög xop, xi' yiy'ax xohix yög xop,
xix hãm xexka xohix yög xop, xix xop xohix.

¹⁰'Ûxohix te 'ãmãnex xop putuk,
tu Topa pu hãpxopmã max.

Topa te nôm xat, yã' yög tikmũ'ün,
ha Topa yög tikmũ'ün te' nõy xohix xat putup hãm xexka tu'.
Kaxiy.

¹¹'Äte' pẽnãhã 'üxeheh, tu pexkox yög nü'pok xop 'ãpak, yã' xohix te' 10.000 punethok xi' 1.000 punethok. 'Ûxohix te nôm te' xat xakot, yã nôm te mĩmpe yũm'ax yĩmũ' yũm, xix yõnnã'ĩ te' 4 xakot, xix tik xexka te' 24 xakot. ¹²'Ûxohix tek-tex ka'ok, hu:

—Hõmã tikmũ'ün tep-tex Kahnën Kutok.

Pa hõnhã 'ãxip, yã 'ãmax, yã 'ãka'ok nõynã'ãmög.

Xate' xohix yög hãpxop pop. Xate hãpxohix yümmüg,

ha' xohix te 'ãmün 'ãpak, nüy 'ãxexka mĩy, nüy 'ãmün 'ãktux max.
Kaxiy.

¹³Ha ta' xupak 'ãte 'ühi xop xohix pexkox tu' xix kõnãg xexka tu', yã xohik-tex, hu:

—Yā' max xe'ēgnāg nōm te' xat, nōm te mīmpe yūm'ax yīmū' yūm.
 Yā' max xe'ēgnāg Kahnēn Kutok.
 Yūmū'āte nōm pu' popmāhā hāpxop xohix.
 Yūmū'āte nōm 'āktux max, tu nōm 'āpak,
 tu' xexka mīy yāy kuxa kopah.
 Tute yūmūg xat putup mōkuma'mōg, ha' kux 'ohnāg.
 Kaxīy.

¹⁴Ha yōnnā'ī te' 4 te:

—Hamūn! Kaxīy.

Ha tik xexka xop te hām tu' pip, tu' kuxa te' yēy, tu Topa 'āktux max xix Kahnēn Kutok 'āktux max.

'Ūkīy'ax

6 ¹Āte xe' pēnāhā', ha Kahnēn Kutok te' kīy'ax māxap xak. Ha ta' xip yōnnā'ī puxet, nōm te' 4 xop kopa' xip. 'Ūyiy te tex tinnā'ax putuk. Tute: —Mā! Kaxīy.

²Āte' pēnāhā', pa' xip kāmānok ponnok, ha nōm te' yīmū' yūm, tu pox kīy tat, ha' nōy te tu' hōm 'ūxat'ax xexka yōg kuxxax yānām 'āta yīxux. Ha ta' mōg, nūy hām xexka pop xix yōg tikmū'ūn pop.

³Ha ta xe' xak kīy'ax nōy Kahnēn Kutok te', yā kīy'ax tix, ha 'āte' xupak, ha yōnnā'ī nōy, yā' tix te hām'āktux, hu:

—Mā! Kaxīy.

⁴Yiy ta' xupep kāmānok nōy, yā xuttah, ha 'ōm te' yīmū' yūm, ha' nōy te nōm ka'ogāhā', puyiy tikmū'ūn yāykix kakīynāgā'. Ha nōm te kāmānok yīmū' yūm, tu' pop mīkax xexka tox. ⁵Ha ta xe' xak 'ūkīy'ax Kahnēn Kutok te', yā' tikoyuk, ha 'āte' xupak, ha yōnnā'ī nōy, yā' tikoyuk te:

—Mā! Kaxīy.

'Āte' pēnāhā', pa' xip kāmānok nōy, yā' mūnnīy. Ha nōm te' yīmū' yūm, tu' tat hāpxop mōmūg'ax. ⁶Ha 'āte' xupak, ha yōnnā'ī te' 4 te hām'āktux, hu:

—Māyōn puxet ha' hām'ax yōg tayumak te' pop xuxnāg xe tox xap nit puxet pe xenat xap yōg nit tikoyuk. Pa' nōy hok 'ayet hep tox xix xupyāg mōy hok, yā nōnenex hok! Kaxīy.

⁷Ha ta xe' xak 'ūkīy'ax nōy Kahnēn Kutok te', yā 4, ha 'āte' xupak, ha yōnnā'ī nōy, yā' 4 te:

—Mā! Kaxīy.

⁸Āte' pēnāhā', pa' xip kāmānok nōy, yā pap-nok putuk. Ha 'ōm te' yīmū' yūm, tu' xuxet'ax yā Xakix'ax, kaxīy, xix Hāmgāyāgnāg Pet, kaxīy, tu kāmānok nōy pe' mōg 'ūyīkāgnāg. Ha' nōy te nōm kā'ogāhā', puyiy xat, hām xexka yōg tikmū'ūn yōg yāg te' 4 yōg yāg puxet kix, yā tikmū'ūn te yāykix kakīynāg putup, tu' putup xūy hā' xakix putup, tu hāmpakut hā' xakix putup, ha kokxop gāy te' kix putup.

⁹Ha ta' xak 'ūkīy'ax nōy Kahnēn Kutok te', yā' 5, ha 'āte' pēnāhā', pa' pip yāmīy xohix kokxop mō'hap'ax kakak. Hōnhā yā yāmīy, pa hōmā yā

tikmũ'ün, tu hãm xexka tu' pip, tu Topa yõg hãm'apak max'ax ãktux, yĩy ta tikmũ'ün gãy, tu' kix, ha' xakix, tu nõmhã yã' yãmiy, tu' pip xokxop mõ'hap'ax kakak, ¹⁰tu hãm'ãktux ka'ok, hu:

—Topa, xatek mũg xat, yã 'ãka'oknãm. Xate' xohix xat. 'Amax xe'ëgnãg, tu hãpxe'e mĩy. Hãm 'ũmhã xate hãm xexka yõg tikmũ'ün yõg hãpkummugã'ax hã nõy yãnãn putup? Yã nõm tek mũg kix, hak xakix. Kaxĩy. ¹¹'Ûxohix te' pop topixxax ponnok tox, ha' nõy te:

—Nãy, 'ũhip kutõgnãg, ha mõktu' xohix xexka nũn, tu nũktu' mõxaha nũnteh, yã Topa yõg kãmãnat kamah, yã 'ãxop putuk, yã 'ãxape xop. Tikmũ'ün te nõm kix putup kamah, ha' xakix putup. Kaxĩy.

¹²Ha ta' xak 'ũkiy'ax nõy Kahnãn Kutok te', yã' 6, ha hãm xexka nuhuknãm, tu yãy pot, ha ta mãyõn yãyhãm-niy, tu topixxax mũnniy putux putuk, ha ta mãyõn hex yãyhã xuttah, tu hep 'ãta putuk. ¹³Ha ta mãyõnnãg te pexkox tu' yĩxohoh, yã mĩnta pik xakux'ax putuk, yã 'ãmuuh xexka te' kup nuhuk, hã kaxiy putuk. ¹⁴Ha ta' nõg pexkox, tu tappet tox kiy putuk, ha yĩktix xohix xexka te yãy pip'ax nĩm, tu ta' mõg xix hãm tot kõnãg yõg xohix te yãy pip'ax nĩm, tu ta' mõg. ¹⁵Ha ta' pip 'ũxat'ax xop, xix xexka xop, xix xonat xexka xop, xix 'ũp-texop xexka xop, xi' ka'ok xop, xix kãmãnat xop, xix xuxyã xop. Yã' xohix xexka te yãy xaptop mĩkaxxap xexka kakak xix yĩktix tu', ¹⁶tu yĩktix pu hãm'ãktux xix mĩkaxxap pu hãm'ãktux, hu:

—'Äpu 'ũgmũ yĩmũg nãy, nũy 'ũgmũ mõ'nĩy, nũy 'ũgmũ xaptop, puyiy nõm tek mũg pãnã hok nõm te' xat, yã nõm te mĩmpe yĩmũ' yũm, puyiy Kahnãn Kutok tek mũg yãnãn hok. ¹⁷Yã hõnhã nõm gãy xexka'. Tep te' gãy'ax hã' tot putup? Yã 'ap hã' tot putup'ah. Kaxiy.

'Iyaet yõg tikmũ'ün xohix te' 144.000

7 ¹Hãpxip 'ĩhã 'ãte' pãnãhã pexkox yõg nũ'pok'ax te' 4, ha' pip hãm xexka tu', ha yãp-xet xip nõntix tu' ha' nõy xip xot tu', ha' nõy xip mãyõn mõ'nã'ax tu', ha' nõy xip mãyõn xupep'ax tu'. Yã' xohix te 'ãmuuh mũg 'ũyĩm hã, puyiy 'ãmuuh mõkoux hok hãm xexka tu', xix kõnãg xexka tu', xix mĩmmãtik tu'. ²Ha 'ãte' pãnãhã', pa' xip pexkox yõg nũ'kutnã'ax, tu mãyõn xupep'ax tu' nũn, tu Topa yõg kax'ãmi'ax tat, yã Topa xe'ëgnãg yõg, yã Topa hi xe'ëgnãg. Pexkox yõg nũ'kutnã'ax te hãm'ãktux ka'ok yãy xape te' 4 pu'. Yã Topa te nõm 4 xop ka'ogãhã', puyiy hãm xexka koxyõy xix kõnãg xexka koxyõy. ³Ha nõm pexkox yõg nũ'kutnã'ax te:

—Hõnhã' koxyõy hok hãm xexka xix kõnãg xexka', xix mĩhĩm. Nãy, puk mũ'ãte' kax'ãmi Topa yõg kãmãnat xohix xexka kux tu'. Kaxiy.

⁴Hã 'ãte' xupak 'ũxohix texiy 'ũkux tu' kax'ãmip-tup, yã Topa yõg xop, yã hep puxet 'Iyaet yõg tikmũ'ün xohix te' 144.000, ⁵yã Yona yõg xupepmã xop yõg xohix te' 12.000, xix Ho'op yõg xupepmã xop yõg xohix te' 12.000, xix Gat yõg xupepmã xop yõg xohix te' 12.000, ⁶xix 'Axe yõg xupepmã xop yõg xohix te' 12.000, xix Nãptanix yõg xupepmã xop yõg xohix te' 12.000, xix Mãnãxex yõg xupepmã xop yõg xohix te' 12.000, ⁷xix Xĩmẽãm yõg xupepmã

xop yōg xohix te' 12.000, xix Nemi yōg xupepmã xop yōg xohix te' 12.000, xix Ixakat yōg xupepmã xop yōg xohix te' 12.000, ⁸xix Yemonōm yōg xupepmã xop yōg xohix te' 12.000, xix Yoye yōg xupepmã xop yōg xohix te' 12.000, xix Meyamīy yōg xupepmã xop yōg xohix te' 12.000. Yã xohix te' 144.000.

Tikmũ'ún xohix xexka'

⁹Hãpxip 'ihã 'áte' pēnãhã, pa' pip tikmũ'ún xohix xexka', yã' xohix. Tep-te' mōkupix? Yã mōkupix yummüg 'ohnãg. Yã' pip punethok, yã xop xohix yōg, xix hep xohix xop yōg, xix hãpxexka xohix yōg xop, xi' yiy'ax xohix yōg xop. Yã' xohix tek-nihã' pip nōm te' xat keppah, yã nōm te mĩmpe yũm'ax yĩmũ' yũm, xix Kahnēn Kutok keppa' pip, tu' xohix te' tat topixxax ponnok tox, tu paxxap xux pop 'üyĩm hã, ¹⁰tu' xohix te hãm'ãktux ka'ok, hu:

—Topa te yũmüg kuxa kummuk xit, nüy kuxa max mō'tat 'üyãnãn tu', yã Topa xexkanãm, xix Kahnēn Kutok, tu' xat'ax yōg mĩmpe mãm'ax yĩmũ' mãm. Kaxiy.

¹¹Ha pekkox yōg nü'pok'ax xohix xexka tek-nihã' pip, tu nōm te' xat yōg mĩmpe yũm'ax xakot tik xexka te' 24 mütik xix yōnnã'ĩ te' 4 mütik, tu hãm tu' pip, tu hãm tu nũktettex, tu' pip nōm te' xat yōg mĩmpe yũm'ax keppah, tu Topa xexka mĩy yãy kuxa kopah, tu:

¹²—Hamũn, 'ãpu yũmũ Topa 'ãktux max mōkuma' mōg, ha' kux 'ohnãg. Topa yã' max xe'ëgnãg, tu hãmyũmmüg xexkanãm mōkuma' mōg, ha' kux 'ohnãg. Topa te yũmũ'ã' popmãhã hãpxop xohix, yiy yũmũ'ãte hãm'ãktux, hu: “Ámax. Puxix. 'Úmax.” Kaxiy. 'ãpu yũmũ hãm'ãktux hã kaxiy hãmyãxatamuk xohix kux 'ohnãg hã. 'ãpu yũmũ yãy yōg Topa 'ãpax mōkumagmōg, ha' kux 'ohnãg. Topa te hãpxop xohix yũmmüg tu' ka'oknãm hãmyãxatamuk xohix kux 'ohnãg hã. Hamũn. Kaxiy.

¹³Ha ta tik xexka puxet xip, tuk yĩkopit, hu:

—'Ū'ũm 'õhõm, yã topixxax ponnok tox tat? Hãm 'ũm tu' nũn? Kaxiy.

¹⁴Ha 'ãte:

—'İntu', xate' yũmmüg. Kaxiy.

Ha:

—Yã hõmã 'üyōg hãpxop kummuk xexka', tu' xüy xexka', tu yãy yōg topixxax pix Kahnēn Kutok hep 'ãta kopah, yiy topixxax ponnok. ¹⁵Nōm xop pip Topa keppa xix Topa yōg mĩmpe yũm'ax keppah. Topa pet kopa' pip 'ãmniy 'ihã xix hãptup 'ihã, ha nōm te mĩmpe yũm'ax yĩmũ' yũm te nōm xop hã tep-tup. ¹⁶A xe putup 'ũm pip putup'ah xix kōnãg putup pip putup'ah 'ũxeheh. Ha mãyõn yãnãm ka'ok te nōm xop puk putup'ah 'ũxeheh, xix kuxap ka'ok te nōm xop puk putup'ah 'ũxeheh. ¹⁷Hamũn, Kahnēn Kutok xip, 'ũxat'ax yōg mĩmpe yũm'ax tu' xip, tu nōm xop pēnãp-tup, yã Kahnēn pēnã'ax max putuk, tu nōm mōgãp-tup hãmmax tu', xix kōnãg xupep'ax tu', ha yōg kōnãg te tikmũ'ún hĩnnãhã', ha Topa te' pota pa hep xohix nagãp-tup. Kaxiy.

'Ükîy'ax, yā' 7

8 ¹Ha ta xe kîy'ax nōy xak Kahnēn Kutok te', yā kîy'ax 7, ha' yēy, yā hām'āpak 'ohnāg 'ot xahix hā. ²'Āte' pēnāhā', pa' pip pexkox yōg nū'pok'ax te' 7 nōm te Topa keppa' pip, tu' pop mîxux xop tut te' 7, nūy kaxyā'.

³Ha ta' xip pexkox yōg nū'kutnā'ax nōy, tu könnōn mō'hap'ax yîka' xip. Tute' pop kugōy hax max yōg könnōn, nūy pugā', nūy kugōy yāy kotinnā 'ükuxa mām ka'ok xop yōg Topa pu hām'āktux mütik, puyîy kugōy mōg pepix Topa pu hām'āktux mütik Topa hah. 'Ūpugāhā könnōn mō'hap'ax yānām 'āta yîxux yîmū' nōm te' xat yōg mîmpe yūm'ax keppah. ⁴Ha pexkox yōg nū'kutnā'ax te könnōn nū'xok könnōn mō'hap'ax yîmū', ha könnōn yōg kugōy mōg pepi' 'ükuxa mām ka'ok xop yōg Topa pu hām'āktux mütik, tu mōktu Topa tu' mōxaha', ⁵ha pexkox yōg nū'kutnā'ax te könnōn yōg kânēy paha', tu könnōn mō'hap'ax tu' paha kuxap, tu' xix kânēy kopah, tu mō'yōn hām xexka tu', yîy ta tex tinnā punethok, ha yānām kō'āynām, ha hām xexka nuhuk, tu yāy pot.

Mîxux xop tut kaxyāhā'

⁶Ha ta' pip pexkox yōg nū'pok'ax te' 7, tu' pop mîxux xop tut, nūy kaxyā'.

⁷Ha pexkox yōg nū'kutnā'ax māxap te mîxux xop tut kaxyāhā', ha tex xap nū'nāhā xix kuxap hep 'āta mütik tu nūktu: "Po," kaxîy hām xexka tu', ha' puk hām xexka yāg puxet, ha ta yāg tix puk 'ohnāg, ha mîm yāg puxet puk, ha ta yāg tix puk 'ohnāg, ha mîxux yîxux yāg puxet puk, ha ta' yāg tix puk 'ohnāg.

⁸Ha pexkox yōg nū'kutnā'ax nōy xip, yā' tix, tu mîxux xop tut kaxyāhā', ha ta pexkox tu' xip hāpxop, yā yîktix xexka putuk, tu kuxap xexka hā' puk, ha nōm te' paha', tu hām tu nū'yōn yîktix, ha ta' nāhā', tu nūktu: "Po," kaxîy, kōnāg xexka tu'. Ha kōnāg xexka yāg puxet te yāyhā hep 'āta', ha ta' yāg tix te yāyhā hep 'āta 'ohnāg. ⁹Ha ta' xakix kōnāg xexka kopa' pip xop yāg puxet, ha ta' xakix 'ohnāg yāg tix, ha ta yāy koxyōy mîpkox yāg puxet, ha ta' yāg tix yāy koxyōy 'ohnāg.

¹⁰Ha ta' xip pexkox yōg nū'kutnā'ax nōy pexkox tu', yā pexkox yōg nū'kutnā'ax tikoyuk, tu mîxux xop tut kaxyāhā', ha ta pexkox tu' nāhā māyōnnāg, tu' puk, yā kuyānām tat'ax xexka putuk. 'Ūnāhā, tu nūktu: "Po," kaxîy, kōnāg kox yāg puxet tu', ha ta' yāg tix hā mō'nā 'ohnāg, tu kōnāg xupup kox yāg puxet hā mō'nāhā', ha ta' yāg tix hā mō'nā 'ohnāg. ¹¹Yā māyōnnāg 'ūxuxet'ax, tu: kohāgnāg'ax. Kaxîy. Ha kōnāg yāg puxet yāyhā kohāgnāg, ha ta yāg tix yāyhā kohāgnāg 'ohnāg, ha tikmū'ūn punethok te' xo'op, hu' xakix.

¹²Ha ta' xip pexkox yōg nū'kutnā'ax nōy pexkox tu', yā pexkox yōg nū'kutnā'ax 4, tu mîxux xop tut kaxyāhā', ha hāpxop te' kix 'ūyāg puxet māyōn yōg, xix māyōn hex yōg, xix māyōnnāg yōg, ha ta 'ūyōg yāg tix kix 'ohnāg, yîy ta' xohix te yāy yōg kuyānām yāg puxet xaxok, ha ta' yāg tix xaxok 'ohnāg, ha ta hām xexka tu hāpkoxtap hāptup yāg puxet, ha ta' yāg tix hāpkoxtap 'ohnāg, ha 'āmnîy te kaxîy kamah.

¹³'Āte' pēnāhā', pa' xip mōmōka', tu' topaha pepi' mōg, tu hām'āktux, hu:

—Hāpkummuk! Hāpkummuk! Yā' kummuk xexka hām xexka xohix xop yōg, ha pexkox yōg nū'pok tikoyuk nōy te mīxux xop tut kaxyāp-tup. Kaxīy.

9 ¹Ha ta' xip pexkox yōg nū'kutnā'ax nōy pexkox tu', yā pexkox yōg nū'kutnā'ax 5, tu mīxux xop tut kaxyāhā'. 'Āte' pēnāhā, pa' xip māyōnnāg hām xexka tu'. Yā hōmā nōm te pexkox tu' nāhā'. Ha' nōy te tu' hōm pipkup mōhāmyīnnīn'ax hāpkox tox xexka yōg, ²ha māyōnnāg te hāpxōn, ha kugōy xexka xupep, yā 'āmuk'ax xexkanām yōg, tu kugōy te māyōn yānām pak, ha yāykote hāpkoxtap. ³Ha ta' pip kunihit kugōy kopah, tu ta' mōg, tu mōktu mōxaha hām xexka tu', ha' nōy te kunihit ka'ogāhā', ha' ka'ok, yā xokpatakuhmīy putuk. ⁴Ha' nōy te' xat, pu xux mā hok, xix mīm xux mā hok, xix mīxux puk mā hok, pa' xat, pu tik kute'ex. Hamūn, yā' pip 'ohnāg Topa yōg kax'āmi'ax nōm tik tu'. ⁵Ūxat, pu kunihit tik kix hok, pa' xat, pu tik kute'ex māyōn 'ānuk xohix te' 5 hā, tu' xūyghāhā', yā xokpatakuhmīy te' xuhmīy putuk. ⁶Ha māyōn 'ānuk xohix te' 5 hā' xūy tihik, tup-tup 'ūxakix, pa' xakix 'ohnāg, 'a' xakix putup'ah.

⁷Yā kunit te xonat yōg kāmānok putuk, nōm te' yāy kix. Tup-tox hā mō'tat 'ūxat'ax xexka yōg kuxxax yānām 'āta yīxux putuk, tu' payīn te tikmū'ūn payīn putuk. ⁸Tu' xe te 'ūn xe putuk, tu' xox te xoktut xox putuk, ⁹tu' kep xax te xonat yōg kepxax putuk, yā pipkup hā' mīy, tu' yīmāg payāhā te hāmnāhūn xexkanām putuk, yā xonat xop yōg kāmānok hāmnāhūn putuk, xix hāpxop yīkūy'ax te hāmnāhūn putuk, yā xonat yōg hāpxop yīkūy'ax, ¹⁰tu' nā'kup xox te xokpatakuhmīy nā'kup xox putuk, tu' nā'kup xox te tik xūyghāhā māyōn 'ānuk xohix te' 5 hā. ¹¹Ha ta' xip kunihit xop yōg xexka', yā pexkox yōg nū'kutnā'ax. Tute hāpkox tox xexka pēnāhā', yā' xuxet'ax 'Amanōm, yā 'Emeneo xop yīy'ax kopah, xi' xuxet'ax 'Apōyām, yā Genex yīy'ax kopah. Yā tikmū'ūn yīy'ax kopah, hu 'ūkoxyōy'ax. Kaxīy.

¹²Tu ta' kux hāpkummuk māxap, ha' nūn putup hāpkummuk nōy tix.

¹³Ha ta' xip pexkox yōg nū'kutnā'ax nōy pexkox tu', yā pexkox yōg nū'kutnā'ax 6, tu mīxux xop tut kaxyāhā', ha 'āte' yānmūn xupep'ax 'āpak, yā xokxop mō'hap'ax yōg xup'ax tu' nūn, yā xokxop mō'hap'ax yānām 'āta yīxux xip Topa keppah. ¹⁴Ha yānmūn xupep'ax te pexkox yōg nū'kutnā'ax pu hām'āktux, yā nōm te' 6 pu hām'āktux, hu:

—Āpu 'āyīm ko'a', pu mōg pexkox yōg nū'pok'ax te' 4, nōm pip kōnāg kox 'Eppanat kūnāpah. Kaxīy.

¹⁵Ha 'īm ko'a', pu mōg. Nōm te' hip nōm 'ot, xix nōm hāptup, xix nōm māyōn 'ānuk, xix nōm hāmyāxatamuk. 'Ūhip, nūy tikmū'ūn yāg puxet kix, puyīy tu xakix, ha ta' yāg tix kix 'ohnāg. ¹⁶Ha 'āte' xupak 'ūxohix nō'ōm, yā xonat te kāmānok yīmū' mām, yā xonat xohix te' 200.000.000. ¹⁷Ha 'āte' pēnāhā, tu kāmānok pēnāhā xix nōm te' yīmū' mām, ha yōg kep xax pip, yā' xutta te kuxap 'āta putuk, xix yīxux te mīkaxxap xapit putuk, xix xutta yīxux te mīkaxxap 'ūxop putuk. Ha kāmānok putox te xoktut putox putuk, ha' yīkox kopa' xupep kuxap xix kugōy xix mīkaxxap 'ūxop. ¹⁸Yā hāpxop xūyghā'ax tikoyuk pip, yā kuxap, xix

kugõy, xix mîkaxxap 'ûxop, tu tikmũ'ûn yâg puxet kix, ha' xakix. Ha ta' yâg tix kix 'ohnâg. ¹⁹Ha kâmânok te' yîkox hâ' nôy kix, xi' nâgkup hâ' kix kamah. Yâ' nâgkup te kâyâp-tox putuk, ha' xox pip, tu nôm hâ tu tikmũ'ûn putop.

²⁰Ha ta' pip 'ûhi xop. Yâ hâpxop xûygâ'ax te nôm kix 'ohnâg. Nôm xop te hâpkummuk mîy kux 'ohnâg, tu yâmîy puk-te'ex kux 'ohnâg, tu topa komut xop pu nûktettex kux 'ohnâg, yâ pipkup yânâm 'âta yîxux hâ' mîy topa komut xop, xix yânâm ponnok hâ' mîy, xix pipkup monôn hâ' mîy, xix mîkaxxap hâ' mîy, xix mîm hâ' mîy. Yâ topa komut xop te hâmpênâ 'ohnâg xix hâ'm'âpak 'ohnâg, xix hâpkumep 'ohnâg. ²¹Tikmũ'ûn te' nôy kixpax, pa yâyhâhup 'ohnâg, nûy hâpkummuk mîy kux 'ohnâg, tu mîm mîy, tu' hup 'ohnâg, tu' nôy hâ xupxet, tu hâpxop xupxet, tu' hup 'ohnâg.

Tappet tox kîy kutõgnâg

10 ¹Ha 'âte' pênâhâ, pa' xip pexkox yõg nû'kutnâ'ax ka'ok pexkox tu', tu kugõy tat, yâ topixxax putuk, tu texxux tep-tox xakot, yâ' kuxxax putuk, tu' pa te mâyõn putuk, tu' kup te kuxap putuk, tu ta' yîxohoh. ²Tu tappet tox kîy kutõgnâg tat 'ûyîm kopah, ha' pata xe'e te kônâg xexka tonnok, ha' pata nôy te hâm tonnok, ³ha' yîy ka'ok, yâ xoktut punethok yîy'ax putuk. 'Ûyîy ka'ok, ha tex tînnâ'ax xohix te' 7 te' yânân. ⁴'Ûyîy kux, ha 'âte' kax'âmi putup, pa 'õm yîy pexkox tu', ha 'âte' xupak, ha hâ'm'âktux, hu:

—'Âpu hâ'm'âktux xaptop. 'Âpu textînnâ'ax yõg hâ'm'âktux kax'âmi hok. Kaxîy.

⁵'Âte' pênâhâ pexkox yõg nû'kutnâ'ax te kônâg xexka tonnok xix hâhâm, ha' yîm pepi' xix, ⁶tu hâ'm'âktux, hu:

—Hâpxip kutõgnâg 'ihâ' nûn. Topa te yõgnû hâ'm'âktux yûmmûg, yâ Topa te' yûmmûg, yâ Topa hi mõkuma'mõg hâmyâxatamuk xohix kux 'ohnâg hâ, tu pexkox mîy xix yâykoteh, xix nôm kopa' pip xop, xix hâm xexka mîy, xix nôm tu' pip xop, xix kônâg xexka mîy, xix nôm te kopa' pip xop. ⁷Hômâ Topa te Topa pupi hâ'm'âktux xop pu hâ'm'âktux xex, yâ hâpxop xaptop. Hâpxip kutõgnâg 'ihâ Topa te nôm hâpxopmâp-tup, ha pexkox yõg nû'pok'ax te' 7 te mîxux xop tut kaxyâp-tup. Kaxîy.

⁸Ha ta xe' yîy pexkox tu', ha 'âte' xupak, ha hâ'm'âktux, hu:

—Mõg, nûy pa tappet tox nôm xip pexkox yõg nû'kutnâ'ax yîm kopah nôm te kônâg xexka tonnok xix hâhâm. Kaxîy.

⁹Ha tak mõg pexkox yõg nû'kutnâ'ax hah, tu:

—'Â' hõm tappet tox kîy kutõgnâg. Kaxîy.

Ha:

—'Ûpa, nûy mâ'. Xate' mâhâ', ha' yâyhâ' xûy putup 'âtex kopah, pa' xuxpex 'âyîkox kopah, yâ pukhep putuk. Kaxîy.

¹⁰Ha 'âte' paha tappet tox 'ûgyîm kopah, tu' mâhâ', ha' xuxpex 'ûgyîkox kopah, yâ pukhep putuk. 'Âte' mâhâ', ha hâpxip 'ihâ' xûy 'ûktex kopah. ¹¹Ha tute:

—Xate Topa yōg hām'āktux pop. Xate hām'āktux putup tikmũ'ūn xohix pu', xix hāpxexka xohix xop pu', xi' yīy'ax yōg xohix xop pu', xix hāpxexka xohix yōg tik xat'ax xohix pu'. Xate hām'āktux putup, hāpxop kummuk nūn. Kaxīy.

Tik tix te Topa yōg hām'āktux 'āktux

11 ¹Ha' nōy te 'ā' hōm mōhāmmūg'ax tox, tu:
 —'Āpu mō Topa pet xexka mūy, nūy mēn xohix texīy yūmmūg, xix xokxop mō'hap'ax yōg mēn kamah. 'Āpu mōkupix 'ūxohix te Topa keppa nūktettex Topa pet xexka kopah. ²Pa 'āpu mō hām mūy hok hām nuhnōg Topa pet xexka kūnāpah, yā Topa pet xexka yīkāgnāg hā. Hamūn, Topa te hām hōm Yoneo xop kūnāpa pip xop pu', ha nōm te hām tonnok putup māyōn 'ānuk xohix te' 42 hā, xix kōmēn xe'ēgnāg tonnok putup kamah. ³'Āte mō'pok putup tik tix, puyīy yōgnū hām'āktux 'āktux hām xexka tu'. Nōm te topixxax kummuk mō'tat, nōm hāg tu xago. Hamūn, yā' kuxa hittup 'ohnāg, yā tikmũ'ūn te hāpkummuk mīy. Nōm te Topa yōg hām'āktux 'āktux putup 'āmnīy xohix te' 1260 hā. Kaxīy.

⁴Yā Topa yōg hām'āktux tat'ax tix te mīm kup 'onimet tix putuk, xix kuyānām tat'ax tix putuk. Nōm te hām xexka yōg xat'ax xexka keppa pip putup. ⁵Tikmũ'ūn 'ūm te nōm tik tix kute'ex kummuk, puxix tik tix yīkox kopa' xupep kuxap, nūy puknōg gāy xop kummuk koxyōy, nūy nōm kix, ha' xakix putup. ⁶Topa te tik tix ka'ogāp-tup, ha nōm te' xat putup, hu pexkox mō'niy, yīy tex tip-tup 'ohnāg, ha tik tix te Topa yōg hām'āktux 'āktux putup. Ha Topa te tik tix ka'ogāp-tup, ha nōm te' xat putup, yīy ta kōnāg xupup kox xohix yōg kōnāg te yāyhā hep 'ātap-tup. Ha Topa te nōm ka'ogāp-tup, puyīy hām xexka kix, yīy ta' nūn putup hāpxop kummuk xohix, tik te nōm putup.

⁷Tu ta Topa yōg hām'āktux 'āktux kux, ha ta hāpkox tox xexka kopa' xupep xok xexka', nūy tik tix mūtik yāy kix, tu' xat putup, tu' nōy kix putup, ha' xakix, ⁸ha' yīn pip putat kopa kōmēn xe'ēgnāg kopah, yā tikmũ'ūn tep-tex Yeyox mīpkupnix yīmū' kōmēn xe'ēgnāg tu'. Yā kōmēn yōg tikmũ'ūn te hāpkummuk mīy. Yā kōmēn 'āxet'ax Xonōm Putuk xix 'Eyit Putuk. ⁹'Ūxohix xop te tik tix yīn pēnāp-tup 'āmnīy tikoyuk xix xahix hā. Hāmūn, 'ūxat putup, pu nō hāpkot hok. 'Ūxohix te' pēnāp-tup, yā hām xexka yōg xohix xop, yā' hep xohix xop xix yīy'ax xohix xop, xix xop xohix, ¹⁰tu hām xexka yōg tikmũ'ūn xohix kuxa hittup putup, 'ūxakix tik tix hah. 'Ūxohix kuxa hittup, tu yāy pu hāpxop max hok popmāp-tup. Hamūn, nōm tik tix te Topa pupi hām'āktux, tu' xat, pu hām xexka yōg tikmũ'ūn xūyḡā'. ¹¹Pa 'āmnīy tikoyuk nōg, 'īhā Topa te tik tix kopa xitxok, nūy putpu' hīnnā', yīy tak-nīhā' pip, ha' xohix te' pēnāhā', hu' yīpkutuk xexkah, ¹²ha tik tix te' xupak, pa nōm te' xānā ka'ok hu:

—Mā nūnte pepi!. Kaxīy

Ha ta' mōg tik tix pepi!, tu hāmḡōy xexka hā' mōxaha', tu ta' mōg pepi pexkox tu', ha ta' pip 'ūḡāy xop hām xexka tu', tu' pēnāhā'. ¹³Ha hām nuhuk xexka', tu' yāy pot, yīy ta kōmēn yāg puxet koxyōy, ha ta' yāg te' 9

koxyöy 'ohnäg, yīy ta tikmũ'ün xohix te! 7.000 xakix hãm nuhuk hã. Ha ta tikmũ'ün nõy kuxanög, tu pexkox yög Topa 'ãktux max.

¹⁴ 'Ûnög hãpkummuk tix. 'Ûpênã', 'ünöy nün.

Míxux xop tut kaxyãhã' yã' 7

¹⁵ Ha ta' xip pexkox yög nü'kutnã'ax nõy, yã pexkox yög mökutnã'ax 7, tu míxux xop tut kaxyãhã', ha ta' yīy ka'ok pexkox tu', hu:

—Yümüg xuxyã xexka te' xohix xat, yã Kunnix te' xat hãpxexka xohix yög xexka xop, xix yög tikmũ'ün, tu nõm xat putup hãmyãxatamuk xohix kux 'ohnäg hã. Kaxiy.

¹⁶ Ha ta' pip tik xexka te! 24 pexkox tu', tu' xexka xop yög mĩmpe mãm'ax yĩmũ' mãm, tu ta' yok, tu Topa pu nũktettex, ¹⁷tu:

—Topa xexka', 'ãka'ok, yã 'ãxip mökuma'ãmög hõnhã xix hõmã. 'Ãmax, 'ãka'ok xexka', tu hõnhã 'ãxexka', yã tikmũ'ün xohix xat kõnãmãhã'. ¹⁸ Ha Topap-tup nõg xop 'ügãy xexka', yã' yümmüg 'ãgãy hõnhã, tu xakix xop yög hãpxopmã'ax kopit putup. Nõmhã xate 'ög kãmãnat xop pu hãpxopmã maxp-tup, xix tik te 'ãpupi hãm'ãktux xop pu hãpxopmã maxp-tup, tu 'ög tikmũ'ün pu hãpxopmã maxp-tup, nõm te 'ãyipkutuk, yã' xexka xop xik-tõgnäg xop. Nõmhã xate' koxyöy putup nõm te hãm xexka koxyöy. Kaxiy.

¹⁹ Ha ta' xõn Topa pet xexka pexkox kopah, pa' pênãhã 'ükopa Topa yög pa'ax yög mĩpkox. Ha ta yãnãm kõ'ãynãm, ha tex tĩnnã xe xexka', tu tex xap nü'nãhã', ha ta hãm xexka nuhuk punenhok.

'Ûhün xix xok xexka 'ãta'

12 ¹ Ha 'ãte' pênãhã', pa' xip 'ühün, ha hãpxopmãhã'. Yümũ'ãte' pênãhã', hu' yümmüg hãpxopmã'ax nün putup. 'Ûn te mãyõn tat, yã topixxax putuk, ha mãyõn hex xip 'üpata kakah, ha mãyõnnäg te' 12 te yög kuxxax putuk. ² 'Ûn tek-tok xuk, tu' put putümnäg, hu' xüy, hu' potaha'.

³ 'ãte 'ün pênãhã', pa' xip xok xexka 'ãta', tu! Kẽm. Yã' xexka nãm, pa kakxexka putuk. 'Ûp-tox xohix te' 7, tup-tox kup xohix te' 10, ha' xat'ax xexka yög kuxxax te' 7 pip 'üp-tox xohix yĩmũ'. ⁴ Xok xexka 'ãta te' nãgkup hã' paha mãyõnnäg yãg puxet, ha' yãg tix pop 'ohnäg, tu hãm xexka tu' mö nõy yõn, ha möktu: Po. Kaxiy. Ha 'ün tek-tok put putup, ha ta' nün xok xexka 'ãta, tu nũktu 'ün keppa' xip, nüy kutok mã', ⁵ ha 'ün tek-tok pit put, yãk-tok te hãm xexka yög tikmũ'ün xohix xop xat putup, yã pipkup tox xexka hã' xat putup, yã' xat ka'ok putup. 'Ûk-tok put, ha hãpxip 'ohnäg ha ta 'õm xip, tuk-tok paha', tu nõm mögãhã pexkox tu', yã Topa ha' mög xix Topa yög mĩmpe yũm'ax xe'ëgnäg tu'. ⁶ Ha ta 'ün möxupaha' hãm nak tu'. Yã Topa te 'ün pu' xip'ax mĩy. Ha Topa te nõ tehe 'ãmnĩy xohix te' 1260 hã.

⁷ Ha ta' yãy kix kakĩynäg pexkox tu' Mĩget mütik xok xexka 'ãta xix Mĩget yög pexkox yög nü'pok xop mütik. ⁸ Nõm te xok xexka 'ãta putyõn pexkox künãpa'.

⁹ 'Û'üm xok xexka 'ãta'? Yã Hãmgãyãgnäg, yã Xatanãy. Yã tute hãm xexka yög

xohix xop pu' koit pax. Yā' putyōn pexkox kūnāpā', xix yāy yōg pexkox yōg nū'pok xop, yā yōg xape xop, ha' yīxohoh, tu nūktu hām xexka tu' mōxoha'.

¹⁰Ha 'āte' xupak, pa' yīy ka'ok pexkox kopa hu:

—Hōnhā Topa te tikmū'ūn mōy hāpkummuk kopah. Hōnhā tikmū'ūn te' pēnāhā 'ūka'ok Topah, yā' xexka'. Hōnhā Topa yōg Kunnix te' xohix xat! Hamūn, hōmā Hāmgāyāgnāg xip pexkox tu', tu Topa mūtik hām'āktux, hu: “Topa kopa kuxa mām xop te hāpkummuk mīy.” Kaxīy. Yā 'āmnīy xohix hā hām'āktux te kaxīy xix hāptup xohix hā. Pa' putyōn pexkox kūnāpah.

¹¹Hōmā ha ta yūmūg xape xop te' xut, ha ta Hāmgāyāgnāg te' xut 'ohnāg. Yūmūg xape xop te' xut Kahnēn Kutok hep 'āta hā xix hām'āktux xe'e hā, tu xakix yīpkutuk 'ohnāg. ¹²Pexkox yōg xop, 'āpu 'ākuxa hittup! Pa hām xexka tu' kummuk xexka' xix kōnāg xexka tu', yā Hāmgāyāgnāg te hām xexka tu' xupep. 'Ūgāy xexka'. Tute' yūmmūg hāpxip kutōgnāg puxix tu' kux. Kaxīy.

¹³Ha xok xexka 'āta te' pēnāhā', yā hām xexka tu' xip. Pa' xip 'ūhūn, tuk-tok pit put. Ha ta 'ūn yīnnāhā' xok xexka te'. ¹⁴Pa 'ōm xip, tu 'ūn pu' yīmāg tix popmāhā', yā' xexka 'ūyīmāg, yā mōmōka yīmāg putuk. Ha ta topaha pepix 'ūhūn, tu' mōg, tu mōktu' xupep hām nak tu', ha' nōm nōy te 'ūn hā' tehe' hāmyāxa'amuk tikoyuk xix xahix hā, ha xok xexka 'āta te' xūygā 'ohnāg. ¹⁵Yā xokxexka 'āta yīyko xopa' xupep kōnāgkox, nūy 'ūn mōgā'. ¹⁶Pa hāpxexka te 'ūn hā' tehe', tu yāy pot, ha kōnāg te hāpkox hā mō'nāhā', ¹⁷yīy ta' gāy xok xexka 'āta', tu ta' mōg, nūy yāykix 'ūn xupepmā xop mūtik, xix Topa yōg xat'ax mīy xop xohix mūtik, xix Yeyox yōg hām'āktux xe'e 'āpak xop mūtik, tu' xip hām kux tu' xok xexka 'āta'.

Xok xexka tix

13 ¹Āte' pēnāhā', pa' xip xok xexka nōy, ha' xip kōnāg xexka kopah, tu' xupep, tu ta' mōg, tup-tox kup xohix te' 10, tup-tox xohix te' 7, ha xat'ax xexka yōg kuxxax te' 10 tat 'ūp-tox kup te' 10 yīmū', ha xuxet'ax kummuk kax'āmi 'ūp-tox yīmū'. ²Yā xok xexka te neppat putuk, yā hāmgāy kōmnāg putuk, tu' pata te 'ux pata putuk, tu' yīkox te xoktut yīkox putuk. Ha xok xexka 'āta te xok xexka xexkanāhā', tu ka'ogāhā', pu' xat. ³Pa xok xexka putox puxet xok putuk, pa hāpxip 'īhā' hittup, yīy ta' yēy hām xexka yōg tikmū'ūn xohix, hu xok xexka putup, hu' pe' mōg, ⁴tu xok xexka pu nūktettex. Hamūn, xok xexka 'āta te xok xexka xexkanāhā', tu' ka'ogāhā', ha tikmū'ūn te xok xexka pu nūktettex, tu: —Yā xe'ēgnāg xok xexka'. Yā' ka'ok xexka'. Tep-te yāykix putup xok xexka mūtik? Yā yāykix putup'ah. Kaxīy.

⁵Ha' tux hok, ha xok xexka te hām'āktux kummuk xexka māyōn 'ānuk xohix te' 42 hā, tu' xat pax kamah, ⁶tu Topa 'āktux kummuk kōnāmāhā', xix Topa yōg xip'ax 'āktux kummuk, xix pexkox tu' pip xop 'āktux kummuk. ⁷Ha ta' tux hok, ha xok xexka te yāykix Topa kopa kuxa mām xop mūtik, ha xok xexka te' xut. Ha' tux hok, ha xok xexka te' xat 'ūhep xop xohix, xix hāpxexka xohix yōg xop, xix 'ūyīy'ax xohix yōg xop, xix xop xohix. ⁸Hām xexka yōg xohix xop te xok xexka pu nūktettex. Hōmā ha ta hām xexka xip'ah, ha Topa

te yāy yōg xop 'āxet'ax kax'āmi', yā Topa kopa kuxa mām xop 'āxet'ax kax'āmi yāy yōg tappet kopah, pu tu hi xe'e, ha' kux 'ohnāg, yā Kahnēn Kutok yōg xop nō'ōm. Yā tikmū'ūn te Kahnēn Kutok putex. Pa' nōy xop pip, ha' xuxet'ax kax'āmi 'ohnāg nōm tappet tu'. Nōm xohix te xok xexka pu nūktettex.

⁹Āyīpkox pip, 'āpu xupax. ¹⁰Topa te' xat, puxix tikmū'ūn Topa kopa kuxa mām xop pop putup, nūy mōgā yāy yōg hām tu'. Pa Topa te' xat hok, puxix nōm mōgā hok. Topa te' xat, puxix tikmū'ūn Topa kopa kuxa mām xop kix putup mīkax xexka hā. Pa' xat hok puxi' kix hok, yīy ta' max, pu Topa kopa kuxa mām xop Topa tu' pip ka'ok, nūy 'ūkuxa mām ka'ok.

¹¹Ha 'āte' pēnāhā', pa' xip xok xexka nōy, tu hām kopa' xupep, tu' xip, yā 'ūp-tox kup tix, yā Kahnēn Kutok putox kup putuk, tu hām'āktux te xok xexka 'āta yōg hām'āktux putuk. ¹²Xok xexka yā' xexka', yā' xat'ax ka'ok, yā xok xexka māxap te nōm xexka mīy, ha nōm te xok xexka māxap pu' hāmxopmāhā', tu' xat, pu hām xexka yōg xohix xop te xok xexka māxap pu nūktettex. Yā hōmā xok xexka māxap yōg kayax xexka xip, tu' xok putūmnāg, pa' hittup mō'ka'ok.

¹³Ha xok xexka te hāpxop ka'ok xe'ēgnāg mīy, yā kuxap xānāhā', ha pexkox kopa' xupep kuxap, tu nū'nāhā', tu nūktu hām tu: Po. Kaxiy. Ha tikmū'ūn xohix xexka te' pēnāhā'. ¹⁴Yā xok xexka te hāpxop ka'ok xe'ēgnāg mīy, yīy tikmū'ūn kuxa mām xok xexka kopah. Xok xexka te' koit, yīy tikmū'ūn kuxa mām koit'ax kopah. Xok xexka te hāpxop ka'ok xe'ēgnāg mīy xok xexka māxap keppah, tu tikmū'ūn xat, pu topa komut mīy, yā xok xexka māxap putuk. Hāmūn 'ūnōy te xok xexka māxap xuhmīy mīkax xexka hā, pa' hi'. ¹⁵Topa te' tux hok, ha xok xexka te xit xok topa komut kopah, yīy ta' hi', hu hām'āktux, tu' xat, pu' kix nōm te topa komut pu nūktettex 'ohnāg. ¹⁶Tu' xat pu kax'āmi hām xexka yōg tikmū'ūn xohix yīm xe'e tu', xi' kux tu'. Yā tikmū'ūn xohix xat te kaxiy, yā kutōgnāg xop xix xexka xop, xix 'ūp-texop xexka xop, xix hok xop, xix kāmānat xop, xix xat'ax xop. Yā' xohix. ¹⁷Ūkax'āmi'ax xip 'ohnāg, puxix hāpxop hāmenex 'ohnāg. Yā' kax'āmi xok xexka 'āxet'ax, pe xok xexka yōg xohix texiy.

¹⁸Āpu hāmyūmmūg. Hāmyūmmūg, xayiy yūmmūg putup texiy xok xexka yōg xohix texiy. Yā tik yōg xohix texiy. Yā' 666.

Topa yōg xop tek-tex'ax tup hāk-tex

14 ¹Āte' pēnāhā', pa' xip Kahnēn Kutok yīktix Xiām yīmū', ha ta' pip tikmū'ūn xohix te' 144.000, ha yūmmūg 'ātak Topa xuxet'ax kax'āmi pip 'ūxohix kux tu'. ²Āte' xupak, pa' xip 'ūyānmūn xupep'ax pexkox tu', yā xamoka xexka te hāmnāhūn putuk, xix tex tinnā xexka putuk, xix 'ap kaxyā'ax putuk. ³Ha tikmū'ūn te 144.000 te pēnāhā nōm te mīmpe yūm'ax xe'ēgnāg yīmū' yūm, xix yōnnā'ī te' 4, xix tik xexka'. 'Ūxohix tek-tex'ax tup hāk-tex, yā Topap-tup pax xop te' yūmmūg nōm kutex tup, pa' nōy te' yūmmūg 'ohnāg. Topa te nōm kuxa mām xop pop, yā Topa yōg tikmū'ūn, ⁴yā nōm kuxa tup, tu 'ūn mūtik xonnix 'ohnāg, yā' tup, tu Kahnēn Kutok pe' mōg. Hōmā nōm te hām xexka yōg xohix xop mūtik yāy

koṭinnāhā', ha Topa te nōm yīmōgātux, tu nōm pop, yā Topa yōg xop xix Kahnēn Kutok yōg xop. ⁵Yā nōm xop te' koit 'ohnāg, yā hāpkummuk mīy 'ohnāg.

Topa yōg nū'pok'ax tikoyuk te hām'āktux

⁶Āte' pēnāhā', pa' xip pekkox yōg nū'kutnā'ax nōy, tu topaha', tu pepi' mōg, tu Topa yōg hām'āpak max'ax 'āktux, nūy hām xexka yōg xohix xop pu nōm 'āktux, yā xop xohix pu', xix hep xohix pu', xix yīy'ax xop xohix pu', xix hāpxexka xohix yōg xop pu'. Yā Topa yōg hām'āpak xip ka'ok, tu yōg hām'yāxatamuk xohix kux 'ohnāg. ⁷Pekkkox yōg nū'kutnā'ax te hām'āktux ka'ok, hu:

—Āpu Topa yīpkutuk, nūy Topa xexka 'āktux max. Hamūn, hāpxip kutōgnāg 'ihā Topa te tikmū'ūn xohix yōg hāpxopmā'ax kopit putup. Yā hōmā tute' mīy pekkox xix yāykoteh, xix hām xexka', xix kōnāg xexka', xix kōnāg xupep'ax xohix. Āpu Topa pu nūktettex. Kaxīy.

⁸Pekkkox yōg nū'kutnā'ax te' nōy te māxap pe' mōg, tu:

—Ūkoxyōy, ha' nōg kōmēn xexka Maminōn. Maminōn xexka yōg tikmū'ūn te hām xexka yōg tikmū'ūn xohix mōgāhā', pu tu nōy hā xupxet, yā' kummuk, yā xupyāg xūy xexka putuk.

⁹Ha pekkox yōg mō'kutnā'ax nōy xape tix pe' mōg, tu hām'āktux ka'ok, hu:

—Tep-te xok xok xexka pu nūktettex xix xok xexka yōg komut pu nūktettex? Tep-te' paha xok xexka yōg kax'āmī 'ūkux tu', xix 'ūyīm tu'? ¹⁰Yā nōm te' pop putup Topa yōg gāy'ax xexka', yā xupyāg xūy xexka pop'ax putuk, yā' xūy xexka 'ūkuxa kopah, yā 'ūxop yōg kuxap kopah, ¹¹tu' xūy pip hām'yāxatamuk xohix kux 'ohnāg hā, 'ihā kugōy te pepi' mōg. Ha' xūy kux 'ohnāg hāptup 'ihā xix 'āmniy 'ihā'. Yā' xūy nōm xop, yā xok xexka pu nūktettex xix xok xexka yōg komut pu nūktettex, tu' pop xok xexka 'āxet'ax kax'āmī'. Kaxīy.

¹²Ūmax, pu' kuxa mām xop te Topa yōg putat kopa' pip ka'ok, yā Topa yōg xat'ax mīy xop, yā Yeyox tu' pip ka'ok xop.

¹³Ha 'āte' xupak, pa' xip yānmūn xupep'ax pekkox tu', tu:

—Āpu kax'āmi nūhū', tu: “Ūkuxa hittup nōm te yūmūg xuxyā Yeyox mūtik mōg 'ihā' xakix.” Kaxīy

Ha Topa Koxuk te:

—Hamūn. Hōmā 'ūhām ka'ok, pa nū'yāynōynāg putup pax putup, ha yōg hāpxopmā'ax max mōg putup nūmūtik. Kaxīy.

Mō' put yōn hām xexka yōg tikmū'ūn

¹⁴Ha 'āte' pēnāhā', pa' xip hām'gōy xexkam-nok, ha 'ōm te' yīmū' yūm, yā tik putuk, tu' xat'ax xexka yōg kuxxax tat, yā pipkup yānām 'āta yixux hā' mīy 'ūkuxxax, ha' xip kupukhe xexka 'ūyīm kopah. ¹⁵Ha pekkox yōg nū'kutnā'ax nōy te Topa pet xexka kopa' xupep, tu hām'āktux ka'ok 'ūnōy pu', yā nōm te hām'gōy xexka yīmū' yūm, hu:

—'Āpu 'ōg kupukhe xexka pa'. Mōg, nūy hāpxop xohix put. Hamūn, hōnhā yā hāptup xe'e!. Hām xexka yōg tikmū'ūn xohix te mīnta ta putuk. 'Ūmax, xayīy nōm put hōnhā!. Kaxīy.

¹⁶Ha nōm te hāmōy xexka yīmū' yūm, tu yōg kupukhe xexka paha!, tu mō' put yōn hām xexka yōg, tu' put hām xexka yōg tikmū'ūn.

¹⁷Ha 'āte' pēnāhā, pa' xip pexkox yōg nū'kutnā'ax nōy, tu pexkox yōg Topa pet xexka kopa' xupep, ha' xip kama 'ūyōg kupukhe xexka xox max.

¹⁸Ha ta' xip pexkox yōg nū'kutnā'ax nōy. Tute kuxap pēnāhā, yā xokxop mō'hap'ax yōg kuxap Topa pet xexka kopah, tu xokxop mō'hap'ax yīka' xupep, tu hām'āktux ka'ok 'ūnōy pu', yā nōm te kupukhe xexka xox max mūg, yā nōm pu hām'āktux, hu:

—Mōg, nūy 'ōg kupukhe hā put mīnta 'op hām xexka yōg. Hamūn, yā' ta'. Kaxīy.

¹⁹Ha ta' mōg, tu kupukhe mō' put yōn hām xexka tu', tu mīnta 'op mep, tu mō' nōm yōn hāpxop hep xut'ax kopah, yā Topa 'ūgāy, ha tikmū'ūn koxyōy putup.

²⁰Yā mīnta 'op hep xut kōmēn kūnāpa!, ha tikmū'ūn hep 'āta xupep, tu puxhep xexka mīy, 'ūxexka te! 300 mēn putuk, xi' xet te mēn puxet xix xahix putuk.

Pexkox yōg nū'pok xop te hāpxūygā'ax tat

15 ¹'Āte' pēnāhā!, pa' pip pexkox yōg nū'pok xohix te' 7 pexkox tu', tu hāpxūygā'ax te' 7 tat, yā ka'ax, yā Topa gāy kux putup. Yā 'āte' pēnāhā hāpxop xe'e xaptop. ²'Āte' pēnāhā!, pa' xip kōnāg xexka!, yā xunnuk te minino putuk, xix kuxap mūtik yāykotīnnā'ax putuk. 'Āte' pēnāhā!, pa' pip nōm te' xut xop, pa xok xexka te' xut 'ohnāg, xix yōg komut te' xut 'ohnāg, xix nōm te xok xexka yōg xohix texīy'ax tat, yā 666 kax'ami nōm yīmū', yā' xut 'ohnāg. Ha nōm te' xut xop pip kōnāg xexka yōg hām kux tu', yā kōnāg xexka te minino putuk yōg. Nōm te' xut xop te 'ap mūg, nūy nōm kaxyā!. Yā Topa te tu' popmāhā!, ³hak-tex Mōyyex yōg kutex, yā Mōyyex te Topa pu' hāpxopmā max. 'Ūk-tex kama Kahnēn Kutok yōg kutex, tuk-tex, hu:

—Topah, 'āxexka, tu' xohix xat. Xate hāpxopmā max xe'ēgnāg. 'Āmūn yā hāpxexka xohix yōg tikmū'ūn yōg xat'ax xexka!. Xate hāpxe'e mīy, yā hāpxopmā xe'e!. ⁴Tep-te 'āyīpkutuk 'ohnāg? Tep-te 'āmax xe'ēgnāg 'āktux putup'ah? 'Āp-xet yā 'ākuxa tup xe'ēgnāg, ha hāpxexka xohix yōg tikmū'ūn nūn putup, nūy xa nūktettex. Hamūn, xate hāpxe'e mīy, ha' xohix te' pēnāhā!. Kaxīy.

⁵Hāpxip 'ihā 'āte' pēnāhā!, pexkox xōn, pa' xip Topa pet xexka!, yā topixxax ka'ok hā' mīy. Topa xip, ha nōnte tikmū'ūn te Topa yūmmūg. ⁶Ha ta Topa pet xexka kopa pexkox yōg nū'pok te' 7, tu hāpxūygā'ax te' 7 tat, tu topixxax tup 'ānuk tat, yā topixxax nīn, tu' tat 'ūkote hīy'ax, yā pipkup yānām 'āta yīxux hā' mīy. ⁷Ha ta' pip nōm yōnnā'ī te' 4, ha ta yāp-xet te pexkox yōg nū'pok te' 7 pu' popmāhā 'āmuk xak'ax xohix te' 7, yā pipkup yānām 'āta yīxux hā' mīy. 'Āmuk xak'ax hā nū'xīmnāg Topa gāy'ax, yā Topa xip hāmyāxatamuk xohix kux 'ohnāg hā. ⁸Ha ta' xip Topa yāy pet kopah, ha' pet hā nū'xīmnāg Topa yōg hāmmax xe'ēgnāg xi' yōg ka'ok'ax, yīy ta nū'xīmnāg kugōy hā. Ha tikmū'ūn

te' mōxakux yūmmūg 'ohnāg, ha mōktu' kux hāpxūygā'ax te' 7. Yā pexkox yōg nū'pok te' 7 te nōm xat. Hak-nāy tu' tikmū'ūn te mōxakux putup.

'Āmuk xak'ax kopa' pux Topa yōg gāy'ax

16 ¹Āte' xupak, pa' xip yānmūn xupep'ax ka'ok Topa pet xexka kopah, tu pexkox yōg nū'pok xop pu hām'āktux, hu:

—Mōg, nūy 'āmuk xak'ax kopa' pux Topa gāy'ax hāpxexka tu'. Kaxīy.

²Ha ta' mōg pexkox yōg mōkutnā'ax māxap, tu' yōg 'āmuk xak'ax kopa' pux hām xexka tu', ha ta' pip kayax kummuk xexka tikmū'ūn yōg. Yā nōm yīmū' pip xok xexka yōg kax'āmi, ha nōm te topa komut pu nūktettex.

³Ha ta' mōg pexkox yōg nū'kutnā'ax nōy, yā' tix, tu' yōg 'āmuk xak'ax kopa' pux kōnāg xexka tu', ha ta kōnā'āg te yāyhā hep 'āta, yā' xakix xop yōg, yīy ta' xakix kōnāg kopa hi xohix xexka'.

⁴Ha ta' mōg pexkox yōg nū'kutnā'ax nōy, yā tikoyuk, tu' yōg 'āmuk xak'ax kopa' pux kōnāg kox tu', xix kōnag xupepe'ax tu' yīy ta kōnāg te yāyhā hep 'āta'.

⁵Āte' xupak, pa' xip pexkox yōg nū'kutnā'ax, yā nōm te kōnāg pēnāhā'. Tute:

—Topa 'āmax xe'ēgnāg. Xate hāpxe'e mīy, tu hāpkummuk mīy'ax yānān. 'Āmax xe'ēgnāg. 'Āxip hōnhā xix hōmā. ⁶Hamūn. Tikmū'ūn te Topa kopa kuxa mām xop xuhmīy, xix Topa pupi hām'āktux xop xuhmīy, ha' hep 'āta nū'nāhā', yīy ta xate tikmū'ūn pu' hōm hep 'āta', pu' xo'op. Yā' yānān. Kaxīy.

⁷Āte' xupak, pa' xip yānmūn xupep'ax xokxop mō'hap'ax tu', tu hām'āktux, hu:

—Topah, 'āxexka', 'āka'ok. Xate tikmū'ūn yōg hāpxopmā'ax kopit max, yā' xe'e', yā' yok. Kaxīy

⁸Ha ta' mōg pexkox yōg nū'kutnā'ax nōy, yā' 4, tu yōg 'āmuk xak'ax kopa' pux māyōn tu', yīy ta' pukpex xexka', ha Topa te' xat, pu tikmū'ūn xax mō'hap. ⁹Hāmpukpex xexka te tikmū'ūn xax mō'hap, ha nōm te:

—Yā' kummuk xexka Topah. Kaxīy.

Yā Topa te' xat, pu' xūygā'. Pa nōm te yōg hāpkummuk mīy'ax kux 'ohnāg, tu Topa xexka 'āktux max 'ohnāg.

¹⁰Ha ta' mōg pexkox yōg nū'kutnā'ax nōy, yā' 5, tu yōg 'āmuk xak'ax kopa' pux xok xexka yōg mīmpe yūm'ax xe'ēgnāg tu', yīy ta hāpkoxtap xok xexka yōg tikmū'ūn yōg pip'ax tu', ha tikmū'ūn te yāy yōyxōg putop, 'ūxūy xexka tu'. ¹¹tu:

—Pexkox yōg Topah, 'ākummuk xexka'. Xatek mūg xūygā pax, tuk mū'ā kayax popmāhā'. Kaxīy.

¹²Ha ta' mōg pexkox yōg nū'kutnā'ax nōy, yā' 6, tu yōg 'āmuk xak'ax kopa' pux kōnāg kox 'Eppanat tu', yīy ta' nak. Nōmhā' xip putat nak, puyīy hām tu māyōn xupep tu' nūn 'ūxexka xop. ¹³Ha 'āte' pēnāhā', pa' pip yāmīy yāy'īgāhnāg tikoyuk, yā hupnāg putuk, tu' pip xok xexka 'āta yīkox kopah, xix xok xexka yīkox kopah, xix Topa pupix hām'āktux mō'āmū'ax xop yīkox kopah, tu ta' mōg. ¹⁴Yāmīy kummuk te hāpxopmā ka'ok xe'ēgnāg, tu ta' mōg hām xexka yōg xat'ax xexka xohix xop hah, nūy nōm yāy tu nū'xoh, puyīy yāy'īgāhnāg Topa ka'ok xexka yōg hāptup 'ihā'.

15 “'Ūg'āpax: 'ūgnūn putup, yā xupxet nūn putuk. 'Āpu 'āpa ka'ok, nūy hāmpēnā'. 'Āpu 'āxax xix 'āyīkāgnāg hā nū tat mō'ka'ok, nūy 'āxax top hok, nūy yāyhāphup hok. Xate' mīy, nūy ta 'ākuxa hittup.” Kaxīy.
16 Hāpxip ha ta yāmīy te yāy tunū'xoh 'ūxexka xop hāpxexka tu', yā' xuxet'ax 'Ahmāget hāpxexka', yā Yoneo yīy'ax te kaxīy.

17 Ha ta' mōg pexkox yōg nū'kutnā'ax nōy, yā' 7, tu yōg 'āmuk xak'ax kopa' pux pexkox yokoma tu'. Ha ta Topa pet xexka kopa' xip yānmūnxupep'ax, tu: —Puxix. 'Ūkux. Kaxīy.

18 Ha yānām kō'āyng, ha hāmnāhūn, ha tex tīnāhā', ha hām xexka yāy nuhuk xexka', tu yāy pot. Yā hām yāy nuhuk xexka nām. Hōmā Topa te' mīy tihik hāmāxap xix hōnhā hām yāy nuhuk kutōgnāg, pa nōmhā hām yāy nuhuk xexka nām. 19 Ha ta kōmēn yāy koxip tikoyuk. Ha ta koxyōy hāpxexka xohix yōg kōmēn xohix. Ha Topa te kōmēn Maminōn xexka pe'paxex, tu' gāy xexka', tu yōg tikmū'ūn xūyghāhā'. 20 Ha ta' nōg hāptox xohix kōnāg yōg xix yīktix xohix. 21 Ha ta pexkox tu' pip texxap xexka', tu ta nū'nāhā texxap xexka', yā yāp-xet nō hāp-tux ha' 40 kit. 'Ūnū'nāhā', tu nūktu tikmū'ūn tu nū'nāhā', ha tikmū'ūn te: —'Ūkummuk xexka Topah. Kaxīy.

Hāmūn, 'ūxūy xexka', yā hāpkummuk, yīy Topa 'āktux kummuk.

Xotit xexka'

17 1 'Ūkxip, pa' nūn pexkox yōg nū'kutnā'ax, nōm xip 'ūxape xop te' 7 kopah, yā hōmā 'āmuk xak'ax te' 7 tat. 'Ūnūn tu nūktu:

—Mā. 'Āte xa mūg putup 'ūxūyghāp-tup xotit xexka', yā kōmēn, yā kōnāg kox punethok puka' pip. 2 Ha hām xexka yōg xat'ax xexka xohix xop te xotit xexka mūtik yāy kute'ex, tu hāpkummuk xexka mīy nūmūtik, yā' paptux putuk. Kaxīy.

3 Ha Topa Koxuk tek mōgāhā', ha ta pexkox yōg nū'kutnā'ax tek tat hām nak tu', ha 'āte' pēnāhā', pa' xip 'ūhūn, tu kāyā xexka 'āta yīmū' yūm, yā kāyā xexka 'āta yīmū' pip kax'lāmi'ax kummuk punethok, yā xuxet'ax kummuk kax'lāmi, yā kāyā xexka putox te' 7, tup-tox kup te' 10. 4 Ha 'ūn te topixxax 'āta tat, tu' tat xapmax, xix yīm hī'ax, xix yīpkutok tat'ax, xi' yīpkox xap, xix patakup hīy'ax, yā' xohix te pipkup yānām 'āta yīxux hā' mīy, xix mīkaxxap te takat hā' mīy, xix kupxat xap hā' mīy. Tute' tat kānēy, yā pipkup yānām 'āta yīxux hā' mīy, ha kopa' pip hāpxop punethok yāyīghānāg xi' xut putux, yā 'ūyōg hāpkummuk mīy'ax yōg hāpxop. 5 Ha' kux tu' pip 'ūkax'lāmi 'ūxuxet'ax xaptop'ax, hu: “Kōmēn Maminōn Xexka', yā xotit xop mūktut, xi' kummuk xop mūktut hām xexka yōg.” Kaxīy. 6 'Āte' pēnāhā' 'ūn paptux, yā Topa kopa kuxa mām xop hep 'āta xo'op. Ha Yeyox tu' pip ka'ok, yīy ta' nōy te' kix.

Ha 'āte' pēnāhā', yā 'ūn kummuk. 'Ūgkuxa te' yēy. 7 Ha' nūn pexkox yōg nū'kutnā'ax, tu 'ā' yīykopit, hu:

—Xate xīy tu 'ākuxa te' yēy? 'Āte xa hāmyūmmūgāp-tup. 'Ūhūn xix kāyā xexka', yā nōm te 'ūn tat, yā nōm putox te' 7 xix putox kup te' 10. 8 Xate' pēnāhā kāyā xexka'. Hōmā 'ūhī', pa' xok. Tute hāpkox tox xexka kopa' xupep

putup, ha ta' nōy tep-tex putup. Ha ta' nūn putup tikmū'ūn. Hōmā xip'ah hām xexka', 'ihā nōm tikmū'ūn yōg 'āxet'ax kax'āmi 'ohnāg 'ūhi'ax yōg tappet kopah, putu hi xe'e, ha' kux 'ohnāg. Nōm nūn putup, tu' pēnāp-tup kāyā xexka xok, hu' yēy. Hōmā 'ūhi', tuk-nāy tu' xok, pa hāpxip 'ihā putpu' xip'ax.

9—'Āpu hāmyūmmūg. 'ūp-tox te' 7 te yīktix te' 7 putuk, ha 'ūn te yīktix te' 7 yīmū' yūm. 'ūp-tox te' 7 te tikmū'ūn yōg xat'ax xexka te' 7 putuk, ¹⁰tu' xat'ax xexka te' 5 xakix, ha hōnhā yāp-xet 'ūxexka', tu' tikmū'ūn xat, ha' nōy xexka nūn putup, tu hāpxip 'ihā' xip'ax. ¹¹Ha ta kāyā xexka', yā 'ūxat'ax xexka nōy, yā' 8. Hōmā' xip, pa hōnhā' xip 'ohnāg. Yā' xip 'ūxape xop te' 7 kopah. 'Ūnōy tep-tex putup.

¹²—Ha xate' pēnāhā 'ūp-tox kup te' 10, nōm te' xat'ax xexka te' 10 putuk, tu hāpxip nōm te tikmū'ūn xat putup. Yā Topa te' xat putup, ha nōm te tikmū'ūn xat putup kāyā xexka mūtik hāpxip kutōgnāg hā, ¹³tup-tup hāpxop puxet. 'Ūp-tup, nūy kāyā xexka xexkanā', ¹⁴tu' yāykix putup Kahnēn Kutok mūtik, pa Kahnēn Kutok te' xut putup, xix Kahnēn Kutok te nōm xānā'ax xop te' xut putup, yā yōg yīmōgātux xop, yā nōm te Kahnēn Kutok tu' pip ka'ok. Hamūn te' xut putup. Kahnēn Kutok, yā xuxyā xop yōg xuxyā', xix xat'ax xexka xop yōg xat'ax xexka'. Kaxīy.

¹⁵Ha pexkox yōg nū'kutnā'ax te 'ā hām'āktux 'ūxeheh, hu:

—Pute 'ūm kōnāg kox xohix xotit te nōm puka' yūm? Yā hām xexka yōg xop xohix xexka', yā tikmū'ūn xop xohix, yā' hep xop xohix, yā' yīy'ax xop xohix. ¹⁶Xate' pēnāhā 'ūp-tox kup te' 10 xix kāyā xexka pēnāhā'. Nōm te xotit putup nōg putup. Nōm te' pop putup 'ūyōg hāpxop xohix, ha' xax top'ax, tu xotit yīn māp-tup, tu kuxap hā' koxyōy putup. ¹⁷Hamūn, Topa te' xat, ha tikmū'ūn te kāyā xexka 'āta yōg xat'ax mīy, yā tikmū'ūn tep-tup, yā Topa te' xat.

¹⁸—Xate' pēnāhā, yā' xip 'ūhūn. Yā 'ūn te kōmēn putuk, ha kōmēn kopa' pip tihik, tu nōm te hām xexka yōg xat'ax xexka xop xat putup. Kaxīy.

'Ūkoxyōy kōmēn Maminōn

18 ¹Hāpxip 'ihā 'āte' pēnāhā', pa' xip pexkox yōg nū'kutnā'ax nōy, tu pexkox kopa' xupep, tu ta yīxohoh, yā' xexka', tu' xat punethok, ha hām xexka yōg tikmū'ūn xohix te' pēnāhā', yā' max xe'ēgnāg, ²tu hām'āktux ka'ok, hu:

—'Ūnōg, yā kōmēn Maminōn xexka 'ūnōg. Hōnhā yā yāmīy pet xix yāmīy yāy'īgānāg pet, xix putux kummuk yāy'īgānāg pet. ³Hōmā tute tikmū'ūn mōgāhā', puyīy hāpkummuk xut putux mīy, ha hām xexka yōg xat'ax xexka xop te' nōm nūmūtik, ha tikmū'ūn te yāy hām texop xexka', tu' nōmenex kōmēn Maminōn xexka yōg hāpxop xohix. Kaxīy.

⁴'Āte' xupak, pa' xip yānmūn xupep'ax pexkox tu, tu hām'āktux hu:

—Yōgnū tikmū'ūn, mā, 'āpu kōmēn nīm! Mōg!

'Āpu hāpkummuk mīy hok nūmūtik,

nūy 'āxūy hok nūmūtik.

⁵Yā 'ūyōg hāpkummuk mīy'ax punethok, tu' xexka te yīktix putuk, tu yīktix xanep te pexkox xuhmīy,

ha Topa te yōg hāpkummuk mīy'ax 'ātigāhā'.

6 Kōmēn yōg xop te 'āxop kute'ex kummuk. 'Āpu' yānān.

'Āpu' yānān tix.

Kōmēn yōg xop te 'āxop xūygāhā'. 'Āpu' yānān, nūy nōm xūygā tix.

7 Kōmēn yōg xop te yāy xexka mīy, tu yāy putexop xexka mīy. 'Āpu nōm xūygā xexka', yā' kummugā xexka'.

Hamūn, kōmēn yōg xop te yāy mūtik hām'āktux, hu:

“'Ūgmūg, yāg ka'ok, yā' xohix xat.

'Ap hok yūm'ah 'ūgmūn.

'A 'āte hāpkummuk pēnāp-tup'ah!” Kaxīy.

8 Pa 'āmhook. Tute hāpkummuk mīy, yīy ta' nūn mōka'ok hāpkummuk 'āmniy puxet 'ihā. Yā' xakip-tup, tu' kuxa hittup 'ohnāg putup, tu putup te' kix putup,

ha kuxap te' koxyōy putup.

Yā' ka'ok Topa xexka', tu' nōy yōg hāpkummuk mīy'ax yānān.

Kaxīy.

9 Ha hām xexka yōg xexka xop te hāpkummuk mīy nūmūtik, ha kōmēn mō'hap, ha kugōy te pepi' mōg, ha xat'ax xexka xop te' pēnāp-tup, tu' potap-tup, tu' kuxa hittup 'ohnāg putup, 10 tu' xūy yīpkutuk, tu' pip hāptox tu', tu hām'āktux, hu:

—Tu texīy, tu' kummuk? Kōmēn Maminōn yā' xexka', tu' ka'ok, pa 'ot puxet nōg 'ihā' kux. Yā Topa te 'ōg hāpkummuk mīy'ax yānān.

11 Ha hām xexka yōg nōmenex xop te kōmēn hā potaha', tu' kuxa hittup 'ohnāg. Yā tikmū'ūn te yōg hāpxop hāmenex kux. 12 Yā nōmenex 'ohnāg 'ūyōg hāpxop, yā pipkup yānām 'āta yīxux hā' nō'ōm, xix pipkup ponnok hā' nō'ōm, xix mīkaxxap te takat, xix kupxat xap, xix topixxax te nīn hā' mīy, xix topixxax yīxux mūnnīy, xix topixxax te xet hā' mīy, xix topixxax 'āta', xix hāpxop māynāg mīm max hā' mīy, xix hāpxop xohix xoktox xox hā' mīy, xix mīm te takat hā' mīy, xix pipkup monōn hā' mīy, xix pipkup hā' mīy, xix mīkaxxap mām hā' mīy, 13 xix mīpxax kōnnōn kānēn hā' mīy, xix tēpet xuxpex, xix kōnnōn mō'hap ha' hax max, xix miha' haxnāg max, xix hep haxnāg max, xix xupyāg, xi' top hep 'ayet, xix xuxnāg max kōnnōn, xix xuxnāg xe tox, xix mūnūytut, xix kahnēn, xix kāmānok, xix hāpxop yīkūy'ax, xix tikmū'ūn kāmānat xop, xix tikmū'ūn kuxa'. Yā hāpxop xohix hāmenex kux. 14 Ha nōmenex xop te kōmēn 'āktux, hu:

—Kōmēn yōg tikmū'ūn tep-tup hāpxop max xohix, pa hōnhā' nōg. 'Ūp-te xop xexka tu' kux. Hōmā kōmēn max te yāy putuk, pa' nōg, tu xep xip putup'ah. Kaxīy.

15 Ha nōmenex xop te nōmenex punethok kōmēn kopah, tu hōnhā' xūy yīpkutuk, tu' pip hāptox tu', tu potap-tup, tu' kuxa hittup 'ohnāg.

16 Tu:

—Tu texīy tu' kummuk kōmēn xexka'. Hōmā kōmēn yōg tikmū'ūn te topixxax max tat, yā nīn hā' mīy, yā topixxax 'āta', xix topixxax yīxux mūnnīy, xix kahnēn xe hā' mīy topixxax 'āta', tu xapmax taha', xi' yīm hīy'ax, xi' yīpkutok tat'ax, xi'

yĩpkox xap, yã pipkup yãnãm ľata yĩxux hã' mĩy, xix mĩkaxxap te takat hã' mĩy, xix kupxat xap hã' mĩy. ¹⁷Pa 'ot puxet nõg, 'ihã yõg hãpxop xohix xexka xaxok. Kaxiy.

Ha ta mĩpkox mõgã'ax xexka xop te' pẽnãp-tup hãptox tu', xix nõm te mĩpkox hã' mõg xop, xix mĩpkox mõgã'ax xop, xix nõm te mĩpkox hã tayũmak pop, ¹⁸Yã' xohix te hãm'ãktux ka'ok putup, hu:

—Hãmyãxatamuk xohix xexka hã' xip 'ohnãg kãmẽn nõy te nõm putuk. Kaxiy.

¹⁹Tu yãy putox yĩmũ hãpkõnnõn mõ'pok, yã' kuxa hittup 'ohnãg, tu' potaha', tu' kuxa xũy, tu:

—Tu texiy tu' kummuk? Yã' kummuk kãmẽn pu'. Hõmã mĩpkox yõg tikmũ'ũn xohix mõg kãmẽn tu', tu yãyhãp-texop xexka'. Pa 'ot puxet nõg 'ihã kãmẽn yõg tikmũ'ũn te hãpxop xohix xexka xaxok. Kaxiy.

²⁰Ha ta pexkox kopa' pip xop te:

—Āpu kãmẽn koxyõy'ax hã 'ãkuxa hittup. Yeyox kopa kuxa mãm xop, 'ãpu 'ãkuxa hittup, xix Yeyox yõg mõ'pok xop, xix Topa pupi hãm'ãktux xop. Hamũn, Topa te kãmẽn yõg tikmũ'ũn yõg hãpxopmã'ax kummuk yãnãn. Kaxiy.

²¹Ha ta' xip pexkox yõg nũ'kutnã'ax, tu mĩkaxxap xexka paha', yã' xexka', te mĩkaxxap kõnnõnã'ax putuk. Tute' paha', tu nũ'yõn kõnãg xexka tu', tu hãm'ãktux, hu:

—Kaxiy kãmẽn Maminõn xexka nũ'yõn putup, yã nũ'yõn mõ'ka'ok putup, ha tikmũ'ũn te' xe pẽnãp-tup'ah. ²²Tikmũ'ũn te xe 'ap kaxyã'ax xupak putup'ah kãmẽn kopah, xix kaxyã'ax xop, xix panao kaxyã'ax, xix tonõmet kaxyã'ax, yã xe' xohix xupak putup'ah. Tikmũ'ũn te 'a' xupak putup'ah kãmãnat hãm, xix mĩkaxxap kõnnõnã'ax 'ãpak putup'ah 'ũxeheh, ²³tu xe pẽnãp-tup'ah kuyãnãm tat'ax xix yõg kuyãnãm kãmẽn kopah. Tikmũ'ũn te xe' xupak putup'ah yãyta xop yõg hãm'ãktux kãmẽn kopah. Hõmã kãmẽn yõg nõmenex xop 'ũka'ok xexka', pa hãpxexka nõy yõg nõmenex xop ka'ok kutõgnãg. Hõmã kãmẽn yõg tikmũ'ũn te' koit pax. Kaxiy.

²⁴Hõmã kãmẽn Maminõn yõg tikmũ'ũn te' kix Topa pupi hãm'ãktux xop xix Yeyox kopa kuxa mãm xop kãmẽn kopah, tu' kixgãhã' 'ũxohix hãpxexka xohix tu'. Hã kaxiy Topa te yõg hãpkummuk mĩy'ax yãnãn.

19 ¹Hãpxip 'ihã 'ãte' xupak, pa' xip yãnãmũn xupep'ax xexka pexkox tu', yã tikmũ'ũn xohix yõg hãm'ãktux putuk. Tu hãm'ãktux, hu:

—Īmax Topah. Topa te tikmũ'ũn mõy hãpkummuk kopah. Topa 'ũmax xe'ẽgnãg, tu' ka'ok xexka'. ²Yã' xe'e, tu' yok Topah, hu tikmũ'ũn yõg hãpkummuk mĩy'ax yãnãn. Tute xotit xexka yõg hãpkummuk mĩy'ax yãnãn. Xotit xexka te hãm xexka yõg tikmũ'ũn xohix mõgãhã', puyiy hãpkummuk mĩy nũmũtik. Tute' kix Topa yõg kãmãnat, yiy Topa te nõm xũygãhã'. Kaxiy.

³Tu xe hãm'ãktux ka'ok, hu:

—Īmax Topah. Kãmẽn xexka mõ'xut, ha kugõy te pepi' mõg putup hãmyãxatamuk xohix kux 'ohnãg hã'. Kaxiy.

⁴Ha ta' pip tik xexka te' ²⁴, xix yõnnã'ĩ te' ⁴, tu Topa pu nũktettex, tu Topa 'ãktux max, ha Topa yũm mĩmpe yũm'ax xe'ẽgnãg yĩmũ'. 'Ūxohix te:

—Hamūn. 'ūmax Topah. Kaxīy.

Kahnēn Kutok yōg yāyta yōg 'āmuk xexka'

⁵Ha ta' xip 'ūyānmūnxupep'ax 'ūxexka yōg mīmpe yūm'ax xe'ēgnāg tu', tu: —Topa yōg kāmānat xop, 'āpu yūmū yōg Topa 'āktux max. Tihik, yā' xexka xik-tōgnāg, 'āpu yūmū yōg Topa 'āktux max. Topa yīpkutuk xop, 'āpu yūmū yōg Topa 'āktux max. Kaxīy.

⁶Ha 'āte' xupak, pa' xip hāmnūhūn, yā tikmū'ūn xohix yōg hām'āktux putuk, pe xamoka xexka yōg hāmnūhūn putuk, pe tex tīnnā'ax putuk. 'Āte' xupak, ha nōm te:

—'Ūmax Topah. Yūmū yōg Topa te hāpxop xohix xexka mīy yūmmūg. Hamūn, 'ūxexka'. ⁷'Āpu yūmū hittup, tu yūmūg kuxa hittup. 'Āpu yūmū Topa 'ūxexka 'āktux. Hamūn, hāpxip kutōgnāg 'īhā yāytop-tup Kahnēn Kutok hah, ha 'ūn te yāytop-tup te yāy maxnāhā, nūy yāytax, ⁸tu' pop topixxax tup, yā nīn hā' mīy, yā' xunnuk 'ūyōg topixxax. Kaxīy.

Hamūn, nōm topixxax nīn te Topa kopa kuxa mām xop yōg hāpxopmā'ax max putuk.

⁹Ha pekkox yōg nū'kutnā'ax te 'ā hām'āktux, hu:

—'Āpu kax'āmi, hu: “'Ūkuxa hittup nō'ōm. Yā Topa te nōm xānāhā', pu nū' Kahnēn Kutok yōg yāyta yōg 'āmuk xexka hah.” Kaxīy.

Tu xe:

—Topa te hām'āktux xe'e'. Kaxīy.

¹⁰Ha 'āte pekkox yōg nū'kutnā'ax pu nū'xup, pa tute:

—'Āmhok. Kaxīy hok. 'Āte Topa pu hāpxopmā max yā 'āmūn putuk xix 'āxape putuk, yā Yeyox yōg hām'āpak xe'e' āpak xop putuk. 'Āpu Topa pu nū'āxup. Kaxīy.

Yā Topa pupi hām'āktux xop te Yeyox yōg hām'āpak xe'e' 'āktux.

'Ōm te kām'ānok ponnok yīmū' yūm

¹¹'Āte' pēnāhā', ha pekkox xōn, pa' xip kāmānok ponnok, ha nōm te' yīmū' yūm 'ūxuxet'ax Nōm Te' Nōy Tu' Xip Ka'ok xix Nōm Xe'e'. Tute 'ūxohix yōg hāpkummuk mīy'ax kopit, yā' yok, tu' nōy mūtik yāykix. ¹²'Ūpa te kuxap putuk, tu' tat 'ūxat'ax xexka yōg kuxxax punethok, tu 'ūxuxet'ax kax'āmi tat, pa' xohix te' xuxet'ax yūmmūg 'ohnāg, pa nōm puxet te' yūmmūg yāy yōg xuxet'ax. ¹³'Ūtat topixxax tox, yā' patok 'ūhep 'āta hā. 'Ūxuxet'ax “Topa yōg Hām'āktux.” Kaxīy. ¹⁴Ha pekkox yōg xonat xop te' pe' mōg, tu kāmānok ponnok yīmū' mām kamah, tu ta' mōg, tu topixxax nīn ponnok tup tat, ¹⁵ha mīkaxxexka xox max xip 'ūyīkox kopah, tu' xupep. Tute mīkax xexka hā' xut putup, ha ta hām xexka yōg xop xohix te' xut putup'ah. Tute hām xexka yōg xop xohix xat putup pipkup xexka tox hā. Tute' koxyōy putup, yā mīnta 'op hep xut'ax putuk. Yā' gāy Topah. Topa te hāpxop xohix xexka mīy yūmmūg. ¹⁶Nōm te kāmānok yīmū' yūm, tu topixxax tu' kax'āmi, hu: “'Ūxat'ax xexka yōg xat'ax xexka xix xuxyā xop yōg xuxyā'”. Kaxīy. Tu' paxix yīmū nōm kax'āmi kamah.

¹⁷Ha 'äte' pēnāhā, pa' xip pexkox yōg nū'kutnā'ax māyōn yānām tu', tu' xānā ka'ok putux xohix xop nōm topaha'. 'Ūxānāhā, hu:

—Mā, Topa yōg 'āmuk ha nū'. ¹⁸Mā, nūy 'ūxat'ax xexka yīn mā', xix xonat yōg xat'ax xop yīn, xix xonat yīn, xix kāmānok yīn, xix kāmānok yīmū' mām xop yīn, xix tik xohix yīn, yā kāmānat xop yīn, xix xuxyā xop yīn, xi' xexka xik-tognāg xop yīn. Kaxiy.

¹⁹Ha 'äte' pēnāhā, pa' xip kāyā xexka 'āta, xix hām xexka yōg xat'ax xexka xop pip xix yōg xonat xop. 'Ūxohix tu yāy tu nū'nāhā', nūy yāykix nūmūtik, yā nōm te kāmānok yīmū' yūm mūtik xix yōg xonat xop mūtik. ²⁰Ha kāyā xexka 'āta te' xut 'ohnāg, ha' nōy te' mūg, tu' hīy, tu Topa pupi hām'āktux mō'āmū'ax mūg, tu' hīy. Yā hōmā Topa pupi hām'āktux mō'āmū'ax xop te hāpxopmā ka'ok xe'ēgnāg kāyā xexka 'āta pu'. Tute hāpxopmā ka'ok xe'ēgnāg, pa' koit, yīy ta' pe' mōg tikmū'ūn, yā tikmū'ūn tu' xip kāyā xexka 'āta yōg kax'āmi'ax, tu kāyā xexka 'āta yōg topa komut pu nūktettex.

Ta mō kāyā xexka 'āta yōn kuxap 'ūxop yōg kopah, yā' hi', xix Topa pupi hām'āktux mō'āmā'ax xop kamah. Yā kuxap te kōnāg xexka putuk. ²¹Ha ta nōm te kāmānok yīmū' yūm yōg mīkax xexka te' yīkox kopa' xupep, tu' xuhmīy xonat xop, tu' kix, ha' xakix, ha ta putux yāy'igā xop nūn, tu nūktu xonat xop yīn māhā', tu' hix ka'ok.

Hāmāxatamuk te' 1.000

20 ¹'Āte' pēnāhā, pa' xip pexkox yōg nū'kutnā'ax, tu pexkox kopa' xupep, tu ta yīxohoh, tu' yīm kopa' tat hāpkox tox xexka yōg pipkup hāmyīnnīn'ax xix pipkup māgxap tat, ²tu xok xexka 'āta paha'. 'Ū'ūm xok xexka 'āta? Yā nōm kāyā hittap, yā Hāmğāyāgnāg, yā Niap, yā Xatanāy. Pexkox yōg mōkutnā'ax te nōm hīy hāmyāxatamuk xohix te' 1.000 hā, ³Yā' putxok hāpkox tox xexka kopah, tu mō'yīnnīn, tu' kīy, puyīy hāpxexka yōg tikmū'ūn xe mōgā hok, puyīy tikmū'ūn hāpkummuk mīy hok, ha mōktu' nōg putup hāmyāxatamuk xohix te' 1.000, hak-nāy tu Hāmğāyāgnāg xut, pu mōg hāpxip kutōgnāg hā.

⁴Ha 'äte' pēnāhā', pa' pip nōm xop te' xexka xop yōg mīmpe mām'ax yīmū' mām. Topa te' xat, ha nōm te tikmū'ūn yōg hāpxopmā'ax kopit. Ha 'äte' pēnāhā', pa' pip tikmū'ūn yāmīy. Hōmā nōm tikmū'ūn te Topa yōg hām'āktux kopa kuxa mām, tu hōnhā Yeyox yūmmūg, tu ta' mōg, nūy Yeyox yōg hām'āpak max 'āktux, yīy ta tikmū'ūn te' kix, ha' xakix. Nōm te kāyā xexka pu nūktettex 'ohnāg, xix yōg topa komut pu nūktettex 'ohnāg, tu' pop 'ohnāg kāyā xexka yōg kax'āmi'ax yāy kux tu', pe' yīm tu'. Pa hōnhā hi', tu yāyhā xexka xop Kunnix mūtik hāmyāxatamuk xohix te 1.000 hā. ⁵Hamūn, 'ūputpu' hi hāmāxap, pa xakix xop nōy te putpu' hi 'ohnāg, ha mōktu' nōg hāmyāxatamuk te' 1.000. ⁶Yā' kuxa hittup nōm te putpu' hi hāmāxap. Yā xe xakix putup'ah, pa' nōy xe xakix putup, tu' pip putup Topa yōg hāptox tu', yā xakix tik putuk. Pa' nōy xe xakix putup'ah. Nōm te Topa yōg 'āmānex xop putuk xix Kunnix yōg, tu' zohi' xat putup Kunnix mūtik hāmyāxatamuk xohix te' 1.000 hā.

Hāmgāyāgnāg nu'xok

⁷Hāmyāxatamuk te 1.000 nōg putup, ha ta 'ōm te Hāmgāyāgnāg xut putup 'ūyōg kanet ka'ok kopah. ⁸Ha ta' mōg putup, nūy koit, nūy mōgā hāpxexka xohix yōg tikmū'ūn hāpxexka xohix tu', yā Goge! xix Māgoge!. Ha Hāmgāyāgnāg te nōm yāy tu nū'xoh, puyīy yāykix, yā tikmū'ūn xohix, yā xohix te 'āmot xap xohix putuk hāpkux yōg.

⁹Yā' xohix te hām panip tu' pip, tu ta' nūn putup, tu nūktu Topa kopa kuxa mām xop xakot, xix Topa yōg kōmēn xakot, yā Topa te nōm putup pax. Pa hāpxip 'īhā kuxap te pexkox kopa' xupep, tu nūktu' nāhā, tu nūktu nōm tikmū'ūn koxyōy. ¹⁰Yā Hāmgāyāgnāg te tikmū'ūn pu' koit. Ha' nōy te' mūg Hāmgāyāgnāg, tu nū'xok kuxap kopah, yā mikaxxap 'ūxop yōg kuxap kopah. Yā kuxap te kōnāg xexka putuk, ha' pip kama kāyā xexka xix Topa pupi hām'āktux mō'āmā'ax. Yā' xohix xūy hāptup 'īhā xix 'āmnīy 'īhā hāmyāxatamuk xohix kux 'ohnāg hā.

Tikmū'ūn yōg hāpxopmā'ax kopit

¹¹Ha 'āte' pēnāhā', pa' xip 'ūxat'ax xexka yōg mīmpe yūm'ax xe'ēgnāg xexka ponnok, ha 'ōm te yīmū' yūm. Ha nōm keppa 'ūnōg hām xexka xix pexkox yokoma'. Yā 'ap pip'ah. ¹²Āte' pēnāhā', pa' pip xakix xop, yā' xexka xik-tōgnāg xop, ha' xat'ax xexka yōg mīmpe yūm'ax xe'ēgnāg keppak-nīhā' pip, ha' xōn tappet, tu' nōy xōn. Yā hi'ax xop yōg tappet yā hi'ax xop 'āxet'ax pip tappet tu', hu' hi mōkuma'mōg, ha' kux 'ohnāg. Yā Topa yīkak pip putup. Ha tikmū'ūn hāpxopmā'ax yōg kax'āmi'ax pip tappet tu'. Ha 'ōm te' mōkupix, nūy tikmū'ūn yōg hāpxopmā'ax kopit. ¹³Ha ta' putpu' hi' xakix xop, nōm xakix kōnāg kopah. Ha putpu' hi xakix xop, yā nōm pip xukpot tu', tu' xohix nūn, ha' nōy te yōg hāpxopmā'ax kopit. ¹⁴Ha' putxok kuxap kopa hāpxakix'ax xix xakix xop. Yā kuxap te kōnāg xexka putuk. Kuxap xexka yā xakix'ax tix. ¹⁵Tikmū'ūn yōg xuxet'ax kax'āmi 'ohnāg 'ūhi xop yōg tappet tu', puxix nōy nōm nū'xok kuxap kopah, nōm te kōnāg xexka putuk.

21 ¹Āte' pēnāhā', pa' xip pexkox yokoma' nōy tup xix hām xexka nōy tup. Hamūn, 'ūnōg pexkox yokoma māxap xix hām xexka māxap. ²Āte' pēnāhā', pa' xip kōmēn xe'ēgnāg, yā kōmēn Yenoyanēn nōy tup, tu pexkox kopa' xupep, tu ta yīxohoh. Yā' max yāy putuk. Yā 'ūn te yāy tap-tup putuk, tu' xax max tat, tu' mōg, nūy yāy yīpxox mūy. ³Āte' xupak, pa' xip yānmūn xupep'ax 'ūxat'ax xexka yōg mīmpe yūm'ax xe'ēgnāg tu', tu hām'āktux, hu: —Hōnhā Topa te yāy kotīnnāhā tikmū'ūn mūtik. Tute yāykotīnnāp-tup nūmūtik. Yā yōg tikmū'ūn. Topa xip putup nūmūtik, yā tikmū'ūn yōg Topah. ⁴Topa te tikmū'ūn pa hep kutux putup. 'A xep xakix putup'ah, tu xe' kuxa hittup 'ohnāg putup'ah, tu xe' xūy putup'ah. Yā' nōg hāpxop hittap. Kaxīy.

⁵Ta nōm te' xat'ax xexka yōg mīmpe yūm'ax xe'ēgnāg yīmū' yūm, tu: —Nōmhā 'āte hāpxop xohix tup mīy putup. Kaxīy.

Tu xe 'ā hām'āktux, hu:

—'Āpu nōm kax'āmi' yā hām'āktux xe'e!. 'Ūmax, pu tikmū'ūn kuxa mām hām'āktux kopah. Kaxīy.

⁶Tu xe:

—Puxix. 'Ūkux. 'Ūgmūn yā māxap xix ka'ax, yā 'Appa xix 'Ōm. 'Ok kōnāg putup te 'āp-tex? 'Āte xa hok hōm putup kōnā'āg, yā kōnāg xupep'ax yōg, ha nōm te 'āxop hīnnāp-tup. ⁷'Āte 'ā tu' pip ka'ok xop pu nōm hōm, hak mūn yā 'ūyōg Topah, yā 'ūk-tok xop nō'ōm. ⁸Pa' pip 'ūkuxanōg xop, xi' kuxa mām 'ohnāg xop, xix yāy'īgā xop, xix nōm te' nōy kix xop, xi' nōy hā xupxet xop, xix mīm mīy xop, xix topa komut pu nūktettex xop, xi' koit xop. Yā' xohix yōg pip'ax pip, yā mīkaxxap 'ūxop yōg kuxap kopah, yā kōnāg xexka putuk, yā xakix'ax tix. Kaxīy.

Kōmen Yenoyanēn tup

⁹Ha ta' xip pekkox yōg nū'kutnā'ax, nōm te' xape te' 7 xop kopa' xip. Hōmā nōm xop te 'āmuk xak'ax te' 7 tat, ha nōm kopa' pip hāpxūyā'ax te' 7. Yā nōm pekkox yōg nū'kutnā'ax 'ūkha' nūn, tu nūktu:

—Mā, 'āte xa mūg putup 'ūn te yāyap-tup, yā Kahnēn xetut. Kaxīy.

¹⁰Ha Topa Koxuk tek xat, tuk mōgāhā yīktix xox putox tu', tu 'ā mūg Yenoyanēn, yā kōmēn xe'ēgnāg, ha pekkox kopa' xupep, xix Topa yīka' xupep, tu ta' yīxohoh. ¹¹'Ūyōg kuyānām yā Topa yōg hāmmax xe'ēgnāg'ax. Kōmēn te kuyānām mīy, yā mīkaxxap te takat putuk, yā mīkaxxap yax putuk, xix 'ūtup te mīkaxxap kinixat putuk. ¹²Kōmēn yōg hāmpak'ax tox xexka', ha yōg hāmpak'ax yōg hāmyīnnīn'ax xohix te' 12, ha pekkox yōg nū'pok te' 12 te nōm pēnāhā'. Ha' pip 'ūkax'āmi'ax hāmyīnnīn'ax tu', yā 'Iyaet xop yōg hep xop te' 12 yōg xuxet'ax. ¹³Ha' patpe tu' pip hāmyīnnīn'ax te' tikoyuk, yā patpe xohix te kākīy, yā māyōn xupep tu' tikoyuk, ha xot tu' tikoyuk, ha nōntix tu' tikoyuk, ha māyōn mō'nā'ax tu tikoyuk. ¹⁴Ha kōmēn yōg hāmpak'ax xip mīkaxxap te' 12 yīmū'. Mīkaxxap te' 12 tu' pip kax'āmīx'a, yā Kahnēn Kutok yōg mō'pok te' 12 'āxet'ax kax'āmi'.

¹⁵Ha pekkox yōg nū'kutnā'ax te hām'āktux 'ūgmūtik, tu' tat mōhāmmūg'ax, nūy kōmēn yōg mēn mōkupix, xix hāmyīnnīn'ax yōg mēn, xix hāmpak'ax yōg mēn. ¹⁶Kōmēn yōg hāmpak'ax yōg patpe te' 4. Patpe xohix yōg mēn te yāy putuk. Pekkox yōg nū'kutnā'ax te kōmēn yōg mēn mōkupix, 'ūtux te 2.200 kinōm, xix patpe xix patpe nōy yōg 2.200 kinōm kamah. Ha kōmēn tox pepix yōg kinōm te' 2.200 kamah, yā' yāy putuk. ¹⁷Pekkox yōg nū'kutnā'ax te hāmpak'ax yōg patpe tix yōg mēn mōkupix, yā' xohix te' 64, yā tikmū'ūn yōg mēn hā' mōkupix pekkox yōg nū'kutnā'ax te'. ¹⁸Kōmēn yōg hāmpak'ax te mīkaxxap yax hā' mīy, ha ta kōmēn te pipkup 'āta yīxux hā' mīy, yā kuyānām mīy tu' tup, tu minino putuk. ¹⁹Kōmēn yōg hāmpak'ax yōg kupkūnīy yīmū' pip mīkaxxap te takat punethok. Yā 'ūkupkūnīy kakak yōg mīkaxxap yax, xix 'ūkupkūnīy yīmū' xip tix yōg mīkaxxap xapit, xix 'ūkupkūnīy yīmū' xip tikoyuk yōg mīkaxxap 'ak, xix 'ūkupkūnīy yīmū' xip 4 yōg mīkaxxap 'exmēnat, ²⁰xix 'ūkupkūnīy yīmū' xip 5 yōg mīkaxxap xanōn, xix 'ūkupkūnīy yīmū' xip 6 yōg mīkaxxap xahnix, xix 'ūkupkūnīy yīmū'

xip 7 yōg mīkaxxap kinyot, xix 'ūkupkūnīy yīmū' xip 8 yōg mīkaxxap menit, xix 'ūkupkūnīy yīmū' xip 9 yōg mīkaxxap topay, xix 'ūkupkūnīy yīmū' xip 10 yōg mīkaxxap kinyop, xix 'ūkupkūnīy yīmū' xip 11 yōg mīkaxxap yaxin, xix 'ūkupkūnīy yīmū' xip 12 yōg mīkaxxap 'āmātix. ²¹Ha hāmyinnīn'ax te' 12 te kupxat xap te' 12 hā' mīy, yā yāpzet te kupxat xap puxet hā' mīy. Ha kōmēn yōg putat te pipkup yānām 'āta yixux hā' mīy, yā yānām mīy, tu' tup, yā minino putuk.

²²Ha 'āte' pēnā 'ohnāg Topa pet xexka kōmēn kopah. 'Ap xip'ah. Yā Topa xip kōmēn kopah xix Kahnēn Kutok xip. Puxix. Topa 'ūxexka', tu hāpxop xohix xexka yūmmūg. ²³Ha 'ap xip'ah māyōn, xix māyōn hex, yā 'ap putup'ah māyōn yānām xix māyōn hex yānām. Hamūn, Topa max xe'ēgnāg xix Kahnēn Kutok, hu kuyānām punethok pip. Puxix. ²⁴Ha ta' pip tikmū'ūn hām xexka tu', ha kōmēn te nōm yīmū mō kuyānām yōn, ha hām xexka yōg xat'ax xexka xop nūn putup, tu hāpxop max nūnnāp-tup, tu nūktu kōmēn hā mōxakux. ²⁵Ha kōmēn yōg mōhāmyinnīn'ax xōn hāptup tox hā, tu nōhāmyinnīn putup 'ohnāg. Hāmūn, 'ap xip'ah 'āmnīy 'ōnteh. ²⁶Ha hām xexka xohix yōg hāpxop xe'ēgnāg nūnnāp-tup kōmēn tu', xix yōg hāpxop max. ²⁷Pa hāpxop yāy'igā nūnnāp-tup 'ohnāg kōmēn tu', yā hāpkummuk mīy'ax nūnnāp-tup 'ohnāg xi' koit'ax nūnnāp-tup 'ohnāg. Pa mō'nāp-tup nōm tikmū'ūn, yā 'ūyōg xuxet'ax kax'ami Kahnēn Kutok yōg hi'ax xop yōg tappet tu'.

22 ¹Ha pexkox yōg nū'kutnā'ax te 'ā' mūg kōnāg kox, ha yōg kōnā'āg te tikmū'ūn hīnnāhā', tu kuyānām mīy, tu' tup, tu kinixat putuk. Kōnāg kox te Topa yōg mīmpe yūm'ax xe'ēgnāg tu' xupep xix Kahnēn Kutok yōg, ²tu ta' mōg putat kote', ha ta' pip kōnāg kox yōg hāpkux tix tu' mīm kup tix, yā hi'ax yōg, tu mey puxet 'ihā mīnta ta punethok, ha mey nōy 'ihā mīnta ta' nōy punethok. Yā hā kaxīy mey te' 12 yōg mīnta ta xohix te' 12. Ha yōg mīm xux te hāpxexka xohix yōg tikmū'ūn hittupmāhā'. ³'Ap xip'ah hāpxop kummuk, Topa te nōm putup nōg. Ha ta' xip kōmēn kopa Topa yōg mīmpe yūm'ax xe'ēgnāg xix Kahnēn Kutok yōg, ha yōg kāmānat te Topa pu nūktettex xix Kahnēn Kutok pu nūktettex, ⁴tu Topa pa pēnāp-tup xix Kahnēn Kutok pa pēnāp-tup, ha Topa 'āxet'ax pip tikmū'ūn kux tu', xix Kahnēn Kutok 'āxet'ax. ⁵Ha 'ap xip putup'ah 'āmnīy 'ūxeheh, yīy ta 'ap xip putup'ah kuyānām tat'ax xix māyōn yānām. Yā Topa xexka te hāptupmāp-tup, ha Topa yōg xop te' xohix xat putup hāmyāxatamuk xohix kux 'ohnāg hā.

Yeyox te putpu' nūn

⁶Ha pexkox yōg nū'kutnā'ax te 'ā hām'āktux, hu:

—Nōm hām'āktux 'ūxe'e. 'Ūmax, pu tikmū'ūn hām'āktux kopa kuxa mām. Ha Topa xexka te Topa pupi hām'āktux xop pu Topa Koxuk hōm, ha ta nōmhā Topa te yōg pexkox yōg nū'kutnā'ax mōkutnāhā', nūy Topa yōg kāmānat pu hām'āktux hāpxopmā'ax texīy pip'ax hāpxip kutōgnāg 'ihā. Kaxīy.

⁷Ha Yeyox te:

—'Āpu 'ūxupax. Hāpxip kutōgnāg 'ihāg mōg putup 'āxop hah. 'Ūkuxa hittup nōm te nū hām'āktux 'āpak, nūy mīy. Nū hām'āktux te 'āxop pu

hãpxop xohix yũmmũgãhã!. Hãpxip 'ihã' pip putup nãm hãpxop xohix. Kaxĩy.

⁸'Ûgmũn Yoãm. 'Ãte' xupak nãm hãpxop xohix, tu nãm pẽnãhã!. 'Ãte' xupak kux, tu' pẽnã kux, tu pexkox yõg nü'kutnã'ax pu nũkxup, yã nãm te 'ã hãpxop xohix mũg. ⁹Pa tute 'ã hãm'ãktux hu:

—'Ãmhok. 'Ûgmũn pu nü'ãxup hok. 'Ûgmũn yã Topa yõg kãmãnat 'ãmũn putuk, xix 'ãtaknõy xop putuk, xix Topa pupi hãm'ãktux xop putuk, xix nãm te nü tappet yõg hãm'ãktux 'ãpak xop putuk. 'Ãpu Topa pu nü'ãxup. Kaxĩy.

¹⁰Tu xe 'ã hãm'ãktux, hu:

—'Ãpu tikmũ'ũn pu nü hãm'ãktux 'ãktux. Nũ hãm'ãktux te tikmũ'ũn pu hãpxopmã'ax mũg nãm pip putup. Hãpxip kutõgnãg 'ihã nãm hãpxopmã'ax pip putup. ¹¹Tikmũ'ũn te hãpkummuk mĩy, puxix xe hãpkummuk mĩy putup. Tikmũ'ũn te hãpxop yãy'igã mĩy, puxix xe hãpxop yãy'igã mĩy putup. Tikmũ'ũn te hãpxopmã max, puxix xe hãpxopmã max putup. Tikmũ'ũn 'ũmax xe'ẽgnãg, puxix xe' max xe'ẽgnag. Kaxĩy.

¹²Ha Yeyox te:

—'Ãpu 'ũxupax. Hãpxip kutõgnãg 'ihã 'ãxop hak mõg putup. 'Ãte 'ãxop pu hãpxop popmãp-tup. 'Ãte nãm te hãpxopmã max punethok pu' popmãp-tup hãpxop punethok. 'Ãte nãm te hãpxopmã max kutõgnãg pu' popmãp-tup hãpxop tĩgnãg. ¹³'Ûgmũn yã mãxap xix ka'ax, yã 'Appa xix 'Õm.

¹⁴'Ûkuxa hittup nãm te yãy topixxax tox pix, ha' tup. Topa te' xat, ha nãm te mĩnta ta mãp-tup 'ũhi'ax yõg mĩm kup yõg. Tute kãmãn hãmýĩkox hã mõxakux putup. ¹⁵Pa kãmãn kũnãpa' pip 'ũnõy hã' xupxet xop, xix mĩm mĩy xop, xix yãy'igã xop, xix nãm te topa komut pu nũktettex, xi' koit xop, tu hãpxop mõ'amũl' mĩy

¹⁶Ha Yeyox te:

—'Ûgmũn Yeyox. 'Ãte pexkox yõg nü'kutnã'ax mõkutnãhã', puyĩy nü hãpxop 'ãktux Topa kopa kuxa mãm xop pu'. 'Ûgmũn yã Namix hã xupepmã!. Yõgnũ kuyãnãm ka'ok, yã 'ũgmax xe'ẽgnãg, yã mãyõnnãg xexka kuyãnãm putuk. Kaxĩy.

¹⁷Ha Topa Koxuk te:

—Mã!. Kaxĩy.

Ha 'ũn te yãytap-tup te:

—Mã!. Kaxĩy.

Ha' xupak xop te:

—Mã!. Kaxĩy.

'Ok kõnãg putup te 'ãp-tex? Mã!, nüy kõnãg hok pa', yã kõnãg te tikmũ'ũn hĩnnãhã nõ'õm.

Hãm'ãktux kux'ax

¹⁸Hak mũn Yoãm. 'Ãte xa hãm'ãktux, hu: Xate' xupak nü hãm'ãktux, tu xa hãpxopmã'ax 'ãktux nãm pip putup. Xate tehomi kax'ami!, pe hãm'ãktux

nõy, puxix Topa 'ãxũygãp-tup, yã' putuk nõm hãpxũygã'ax kax'ãmi nõ tappet tu'. ¹⁹Ha xate nõ' hãm'ãktux yãg xut, puxix Topa te 'õg hãpxop max xut putup, yã nõm mĩnta ta xut putup 'ũhi'ax yõg mĩm kup yõg, tu 'õg hãpxop xut putup, yã kãmẽn xe'ẽgnãg yõg Yã nõ tappet te nõm 'ãktux.

²⁰Yeyox te:

—Nũ tappet 'ũmax. Hamũn, 'ãxop hak mõg putup hãpxip kutognãg 'ihã'. Kaxĩy. Hãmũn Yãyã Yeyox, mã' mõ'ka'ok!

²¹Pu yã yũmũg xuxyã Yeyox 'ãxop xohix ha hãmmaxnã'.

Tu ta tu' kux.